

ASO LUA, 14 SETEMA 2021

Na tauaofia le Fono Aoaofaitulafono mo lana Paeaiiga Lona XVII i le itula e 9:32 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga o le Fono Aoaofaitulafono i lana Paeaiiga Lona XVII.

MALELEGA MAI LE AO O LE MALO

TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofaitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe 2021/2022.

TUUIINA ATU i lou nei Lima i lenei aso.....13..... o Setema 2021.

Sainia: Tuimalealiifano Vaaletoa Sualauvi II
OLE AO O LE MALO

FAAALIGA MAI LE TAITAI O LE MAOTA

E tusa ai ma le Tulafono Tumau 76 a le Palemene ua ou tuuina atu nei le Faaaliga i le Fono Aoao Faitulafono mo le iloiloina o le Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o Faiga Palota (Nu.2) 2021.

TUUINA ATU i lenei aso.....Gafua.....13 o Setema i le tausaga 2021.

Hon. FIAME Naomi Mataafa
TAITAI O LE MAOTA

FAAALIGA MAI LE TAITAI O LE MAOTA

E tusa ai ma le Tulafono Tumau 100(2) ua tuuina atu nei le Faaaliga i le Fono Aoao Faitulafono mo le iloiloina o Tulafono Tau Faaofi ua taua i lalo i lona tulaga faanatinati:

1. Tulafono Tau Faaofi o Teuteuga o le Tulafono o Faiga Palota Nu.2 2021.

TUUINA ATU i lenei aso.....13.... o Setema 2021.

Hon FIAME Naomi Mataafa
TAITAI O LE MAOTA

ISI FAASILASILAGA A LE FOFOGA FETALAI

FAASILASILAGA O AVANOA I TOTONU O LE FONO AOAO FAITULAFONO

FOFOGA FETALAI: Ou te faasilasila atu mo le silafia e le Palemene, **ua avanoa nei Nofoa o itumalo palota** ua taua mulimuli ane iinei i totonu o le Palemene.

1. Itumalo Palota o Aana Alofi Nu.2.
2. Itumalo Palota o Aleipata Itupa i Lalo.
3. Itumalo Palota o Falealili Nu.2.
4. Itumalo Palota o Falealupo.
5. Itumalo Palota o Safata Nu.2.
6. Itumalo Palota o Sagaga Nu.2.
7. Itumalo Palota o Sagaga Nu.4.

Mo le silafia e le Maota, ua ou taulimaina nei Tusi Faamaonia o Lipoti ma Faaiuga a le Faamasinoga Maua luga i mataupu tau Talosaga o le Faiga Palota Aoao aso 9 o Aperila 2021 mo Itumalo Palota ua taua i lalo:

1. Itumalo Palota o Aana Alofi Nu.1.
2. Itumalo Palota o Aana Alofi Nu.2.
3. Itumalo Palota o Aana Alofi Nu.3.
4. Itumalo Palota o Aana Alofi Nu.4.
5. Itumalo Palota o Aiga i le Tai.
6. Itumalo Palota o Aleipata Itupa i Lalo.
7. Itumalo Palota o Anoamaa Nu.2.
8. Itumalo Palota o Faasaleleaga Nu.1.
9. Itumalo Palota o Faasaleleaga Nu.3.
10. Itumalo Palota o Falealili Nu.2.
11. Itumalo Palota o Falealupo.
12. Itumalo Palota o Falelatai ma Samatau.
13. Itumalo Palota o Gagaemauga Nu.1.
14. Itumalo Palota o Gagaifomauga Nu.2.
15. Itumalo Palota o Lefaga ma Faleaseela.
16. Itumalo Palota o Palauli Nu.1.
17. Itumalo Palota o Safata Nu.1.
18. Itumalo Palota o Safata Nu.2.
19. Itumalo Palota o Sagaga Nu.2.
20. Itumalo Palota o Sagaga Nu.4.
21. Itumalo Palota o Salega Nu.1.
22. Itumalo Palota o Siumu.
23. Itumalo Palota o Vaimauga Nu.1.
24. Itumalo Palota o Vaimauga Nu.3

Talu ai ona o le aofai o sui usufono mamalu e ono faaaogaina mo ni faaiuga a le Palemene po o le quorum i lona aofaiga o sui usufono e tatau ona auai mai, e 51. O lona uiga e tatau ona 26 sui usufono e faamaonia ai se faaiuga a le Palemene e le aofia ai le Fofoga Fetalai. Peitai, o lea ua avanoa nei o tatou nofoa o itumalo e 7 ma ua tuuitiitia ai le aofai o le Palemene i le 44. O lona aofaiga e tatau ona pasia ai so o se Tulafono ma pasia ai mataupu i totonu o le Palemene, e tatau ona 23. O le taimi lenei, o lo o 25 sui usufono o le mamalu o le Palemene. Ma o nei Tulafono uma ma nei tulafono ma

faamalamalamaga uma o lo o i totonu o le Vaega o le Faavae 57 faatasi ai ma Tulafono Tumau e 34.

TUUINA ATU O PEPA

Na tolaulauina e le Sui Failautusi i le Fono Aoao le faasologa o Pepa e tusa ai ma T.T.49(2).

1. S.R.2021/8, Tulafono o Fanua ma Suafa 2020 – Faasilasilaga o le Amata Faamamaluina (Fuaiupu 43 ma le 44).
2. P.P.2021/2022 Nu.3, Lipoti Faaletausaga a le Matagaluega o Punaoa Faalenatura ma le Siosiomaga mo le Tausaga Faaletupe 2019/2020.
3. P.P.2021/2022 Nu.4, Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe 2019/2020.
4. P.P.2021/2022 Nu.5, Lipoti Faaletausaga a le Ofisa o le Pule Faatonu mo le Tausaga Faaletupe 2019/2020.
5. P.P.2021/2022 Nu.6, Faamatalaga o Sini Autu a le Auaunaga o Vaa a Samoa mo le Vaitaimi 2021-2024.
6. P.P.2021/2022 Nu.7, Lipoti Faaletausaga a le Auaunaga o Vaa a Samoa mo le Tausaga Faaletupe 2019/2020.
7. P.P.2021/2022 Nu.8, Lipoti Faaletausaga a le Faalapotopotoga o Tau'i mo Faalavelave Faafuasei mo le Tausaga Faaletupe 2020.
8. P.P.2021/2022 Nu.9, Lipoti Faaletausaga a le Matagaluega o Faamasinoga ma Pulega tau Faamasinoga mo le Tausaga Faaletupe 2019/2020.
9. P.P.2021/2022 Nu.10, Faamatalaga o Sini Autu a le Faalapotopotoga o le Malosi Faa-Eletise mo le Vaitaimi, 2021/2024.

SAUNOAGA MUA A LE AFIGA I LE FOFOGA FETALAI

FOFOGA FETALAI: I le tulaga aloaia ou te faatalofa atu ai i le paia o le Palemene i lenei taeao fou i ona tulaga faalupe vaeatu le faafofoga tapuai mai a le atunuu i lo outou soifua manuia ma le lagi e mama. Ua tea i lagi le fetu taimatagi aua lenei taeao faitauina o le Malo Tutoatasi o Samoa e ala i lana Fonousu tu maualuga a le Palemene o le atunuu.

Tulouna ia le malu ma le malae, tulouna le alofā o le Maota Fono o Samoa. Tulouna Tiafau o le malae o le faautugatagi a le atunuu pele. Ae i lou ava tele, e talitonu le manatu o lea ua soofue le pua ma le laau e pei o le muafetalai i le paepae o le uluai maota, e faigata paia apoapogata o Samoa, o le atunuu tofi, o le atunuu mamala. O ona sa ma faiga ua taoto e pei o upu i le fata o le malaga i le ala ma le vasa, i le afua mai i le siu i sasae seia paia

le siu i sisifo i le oneone sisina i ou paia faaleatunuu, i ou paia faalemalo, ae a ou paia faale-Talalelei i le aoao o Samoa i ona tafa e fia.

Tulouna Maauga ma Nuuausala, o Malie ma Vaitoelau. Tulouna a Lalogafuafua, ae a Fuifatu ma Vaituutuu, o Finao ma Matia ma Matia Ituau. Tulouna Faletoi ma Vailoa o le tofaga lalaga aua Aiga ma latou Tama, o Tama ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ae le vaea foi le falaooto aua le fale na ula ma Malaetele, o Talamoa seia paia Talisau, o Laloifi ma le Falesau ma le Faleomavaega, e faigata le Laau na Amotasi, Tootoo o le Faleula ma upu i le Manuatele ma le tapuaiga ia Sua ma le Vaifanua, Fofu ma Aitulagi, Saole ma Saleaamua ma le Launiu Saelua ma le Nofo a Maopu.

O ou paia faale-Malo i le tapuaiga a Lau Afioga i le Ao o le Malo ma lau Masiofo, Sui o le Fono a Sui Tofia ma lou Faletua, afio le Palemia ma Minisita o le Kapeneta faapea Minisita Lagolago, Sui Usufono mamalu o le Palemene o Samoa.

E faatalofa atu i lau Afioga i le Faamasino Sili ma le mamalu o le Faamasinoga.

A liliu foi i le itulagi i Sasae, afio le Kovana Sili ma le Lutena Kovana ma le Kapeneta, afio le Peresetene ma le Maota maualuga, le Fofoga Fetalai ma le Maota o Sui, le Faamasino Sili ma le Vaega o Faamasino.

Tulouna ia le afifio o faaao o Ekalesia Kerisiano e fia i Samoa, o Ositaulaga ma Auauna Faauuina a le Atua aua Lana tala e lelei. O i latou o lo o laulauina taumafa faaleagaga mo se manuia auiluma o Samoa. O le a le molia le nofoa i nuu malolo aua o si ota lima lava e paia ai si ota mata. Ae o le faamanatu foi a peau o le tailoloto, aua ina ne i gau le tila lafo i le nuu tu tai pe sola foi le i'a auautetele ae tuu lona foto. A o se gagana a le Nofoa, tatou faafetai i le Atua o lea ua to le fale o tautai. O a faigata o le aleiga na salifoea ai le faatautaiga, aemaise o le taimi muamua lenei ua vevesi ai faiga vaega faaupufai faapenei, ua ou manatu, ia tatou tatanu tapu o faiva. O lea ua tatou aleaga i manu faaifo mai lagi, o lea ua sao i alo le sa o le Toa o le avasaa. Ua topule le Atua o Malo. O le agaga o le Fofoga Fetalai, tatou faafoi faatasi le faamanu ma le viiga ia te Ia lo tatou Atua e toatasi o le alofa fua, o Le e soifua, e soifua lava pea.

Le paia e o le Palemene, vaeatu le faafogafoga tapuai mai a Samoa le atunuu pele, ua tatala le auafa mau talagata, ua to faamanuiaga mo le Afioga i le Sao Faapito ma le Vaega Faaupufai a le Faatuatua i le Atua Samoa ua Tasi mo le tauaveina o le Malo i lenei Paeaiga. Ou te talitonu o le finagalo foi lea o le Atua. Ua na o se tautaualemau a le Nofoa, e le aoaia foi e le matapia le manaia, a o upu a le atunuu, ia o tatou piipiiama vaevae manava. O le tofa e piipiiama pea i le Atua, o le tali lava o le Atua. Ae afai tatou te fefulituaai, o le a valetuulima le sa o le Palemene.

Le paia e o le Palemene, o le tatalo a le Nofoa, tatou alo i luma lo tatou vaa, tuli i luma so tatou ai ma ia failmalu faiva, ia tofa i le Atua le faatautaiga o le sa o le atunuu o lo o tapuai mai. Ua na o tatou o ni meafaigaluega tulou, ua saunia ma tapena e le Atua mo sona viiga e ala i lo tatou valaauina. E le atoatoa foi le Fofoga Fetalai, tulou le gagana, ae maua se manatu ma manuia mea uma pe a tatou mulumuluaufoe ma galulue faatasi.

Samoa ma lau tapuaiga i ona tulaga faalupe, e afua mai ona ao seia paia se aupito itiiti, ioe, ua na o se tofa na moeafusia, ae o ni faamoemoega foi na faaee i le tau. E tau i le lelea pe ana leai lau faanonogamanu. Ua faamalo faafetai tatalo, faamalo le tapuai. O oe lava o le to'a o aso faapenei, o oe o le matua e tausi le alofa molipo, ua malie le loto ua malie le vaai, o lea ua ali le maa Ta'ilesolo, o lea ua tau 'ava 'oto ae faafotu ulu le fetu. Afai ua sipa le lamaga e pei o upu i faatautaiga i le vasa, ia ui magalo mea uma i lou finagalo faale-Atua ae tapuai maia ma le manuia. E tau i manu faiva o lau Palemene ona o lau tatalo ma lau tapuaiga. Ia i ai le agalelei o le Atua i lo tatou atunuu. Ia i ai foi Lona filemu i lau Palemene.

Lau Afioga i le Tamaitai Palemia, le Sui Palemia ma le Kapeneta ma lea itu o le Maota, atonu e i ai se taimi atoa mai le Palemene i ona sui usufono mamalu. Tatou tatalo faatasi i le Atua ina ia alofagia i latou faapea foi i tatou uma, ina ia tatou maua le fefaamagaloi ma ia tatou aveese le tusitusilima a ia maua e i tatou uma o e ua faia mai le fuifui mai le mamalu o itumalo taitasi, ina ia fusia i tatou uma i le fealofani, feoeoeai, galulue faatasi aua se manuia o tatou tagata ma le atunuu atoa. Ia to mai lagi manu o le tatou folauga faa-Palemene i lenei 5 tausaga. Manuia Samoa ua potopoto ma auai e molimauina taualumaga a lau Palemene i lenei taeao. Faamanuia le Atua i Ofisa Sili o Pulega o Matagaluega ma Faalapopotoga a le tatou Malo, faapena foi i le Failautusi o le Fono Aoaofaitulafono ma le afaigaluega o lo o tautua nofotuavae aua le Palemene. Na o le Atua e atoatoa ma manuia ai mea uma tatou te faia, na o ia foi e maua ai lo tatou fesoasoani i lo tatou vaivai ma lo tatou le atoatoa. Ia manuia tele le alo atu o sui usufono mamalu uma o le Maota mo ana taualumaga i lenei taeao.

Na faaalua le agaga faafetai o le Maota i le patipati o latou aao i le maea ai o le Saunoaga Mua a le Fofoga Fetalai.

FOFOGA FETALAI: Ia, o le taimi lenei o le Saunoaga Faa-Minisita a le Afioga i le Tamaitai Palemia.

Ou te tapa ma le faaaloalo lau Afioga i le Palemia mo lau Saunoaga Faa-Minisita.

SAUNOAGA FAA-MINISITA AFIOGA I LE PALEMIA
Afioga Hon Fiamē Naomi Mataafa

Afioga Hon FIAME NAOMI MATAAFA (PALEMIA): Lau Afioga i le Fofoga Fetalai, faafetai mo le avanoa e faia ai se uluai lauga Faa-Minisita i le faasologa amata o le Tauaofiaga Lona Lua lenei o le Palemene XVII. Ou te muai piama i le faafetai ua siitia i lenei taeao fou e lau Afioga e sulaina ai le alofa ma le agalelei o le tatou Matai Sili, o le e faavae ai le Malo o Samoa. O paia ma mamalu o le Maota o Samoa i le nofo a itumalo, tainane tulaga faale-Malo o lena ua e maea paepae. O paia tauave lava ia o le tapuaiga mana a Samoa i ona tulaga faalupe mai mauga tetele seia oo i ona mauga iti.

Le afio tapuai i Le Ao Mamalu o le Malo ma le Sui o le Fono a Sui Tofia faapea le faamalumu mai o le Faamasinoga a Samoa. O le upu i tuamaota o lenei itumalo o Lotofaga, “ou te tu i le to ae maniti tino i le pisaga.” Aua e tofa i tofe le to ma le pisaga, aua ua tuu faafeagai e Samoa i o tatou nei tupulaga, ae o lo o faamalumu mai i latou ua fai i lagi le folauga, na fitaituga i le faavaeina ma le faaauau mai o le sa o lo tatou Malo Tutoatasi. Ua faamalo le folau, ua tau mai le tatou faigamalaga i le lona XV11 o Paeaiga o le Palemene o le Fono Faitulafono a Samoa.

Ua sau le vaa na tiu tau mai i le vaa na tau, a o lo o mamau ligo o le vaa faoafolau. E faapena le uiga o le tatou malaga ma ona auvaa, o e tiu o e o lo o taumalae, ma e ua tapuai mai. Ae o auvaa foi e tuu faasolo i matafaioi. Lau Afioga i le Fofoga Fetalai, e tulaga ese lenei Paeaiga, ma e pine i le vaaiga i lenei taeao ma le tulaga ua le atoatoa le nofoia o Nofoa o itumalo, e pei ona sa sau ai i Paeaiga ua mavae. Ua silia i le fa (4) masina talu mai le aso 9 o Aperila, na faia ai le filifiliga a le atunuu e ala i le palota mo ni sui o le atunuu e tulai mai e faafoe le Faigamalo.

O le taeao muamua lenei ua ulufale ai sui tofia faatautoina o le Fonousu a le atunuu i le Maota lenei i Tiafau, sa fita le tauasaina ma faatini le filifiliga a Samoa na faia ia Aperila. E silia i le tolu (3) masina na tuliloa ai le faaiuga na faia e le atunuu i lana faigapalota tele, ma faamaonia ai e le faamasinoga ia le 26 o Nofoa o le Vaega Faaupufai a le Faatuatua i le Atua Samoa ua tasi, i le 25 o Nofoa o le Vaega o le HRPP. I lena tolu (3) masina, na faatupu se felautoai i upu fai ina ua maea le faigapalota. (1). Faia le Poloaiuga, e faaopoopo ai le sui faipule tamaitai e toatasi e ono (6) ai sui tamaitai o le Maota. (2). Faia le Poloaiuga e toe faia ai le faigapalota tele, ae faaleaogaina le palota o le aso 9 o Aperila. (3). Faia ma toe faasolomuli le Poloaiuga e tauaofia ai le Palemene ma faatauto usufono. (4). Faia o le sauniaga e taoaofia ai le Palemene ma faatauto faipule ma tulaga tofi faale-Malo i le aso 24 Me 2021, o sui uma o le Faatuatua i le Atua Samoa ua tasi. O nei mataupu uma, na iu i le faamasinoga ma tualuga i le faaiuga o le aso 23

Iulai, ma faamaonia ai le Faigamalo a le Faatuatua i le Atua Samoa ua tasi, e pei foi ona sa iu i ai le faaiuga o le filifiliga a le atunuu.

Lau Afioga i le Fofoga Fetalai, ou te le auiliiliina lavasiga ia ua ou taua. E tau o lenei, semanu le mauaa o le Tulafono ma le tasi o itutino o le Tafatolu o Pulega faale-Malo, o le Faamasinoga lea, na tua i ai. Aua ua tulaga le itutino o le Pule Faatonu i se tulaga le tumau. A o le itutino o le Fono Faitulafono, ua faavaemanua i faiga faapolokiki e tineia ai le faatinoga o le filifiliga a le atunuu, e auala i o latou sui usufono, e fai ai le puleto i se Malo e faatulai mai.

Lau Afioga i le Fofoga Fetalai, na taoto le faaiuga a le Faamasinoga e faamaonia ai le Faigamalo lenei i le aso 23 Iulai 2021. O le aso 27 Iulai 2021 na amatalia ai le pulega a lo tatou Malo fou. O le lona ono (6) lenei o vaiaso talu ona pale mai le Malo fou. Na amatalia le galuega i le faaulufale o le Kapeneta i o latou ofisa, ma amata loa faafeiloaiga ma faamasani ma aufaigaluega o a latou Matagaluega. Ua faaopoopo foi le galuega faapulega i le faatautoina o Minisita lagolago. A ua amatalia foi le pitolau a lau Afioga i le Fofoga Fetalai ma lou soatau le Sui Fofoga Fetalau e tapenapena mo le galuega faaauau a le Fono Faitulafono. Na amatalia ma tapena le tala autu o le tupe mo le tausaga 2021/2022, lea ua i le pepa o galuega a le Maota mo lenei fonotaga.

Sa i ai foi nisi o tapenaga faalotoifale i le aufaigaluega tofofi i le itu o faamalologa ma faamavaega mai tofiga. Ona o tulaga ma mafuaaga o aafiaga, o le tulaga ua le mafai ona toe galulue faatasi i le faatuatua. E mafua lea i gaioiga ua le tusa ai ma tiute ma matafaioi i taimi ao loo faagasolo le felautoai i upufai sa faasolo i le faamasinoga. E faapito augafa lea i le tofi o le Loia Sili ma le Failautusi o le Fono Faitulafono. Ua manino foi le faamavae o le sa faauluulu i ai le Matagaluega o Tupe. E lē ona o se ila o lana galuega ae ona o fesootaiga vavalalata faale-aiga ma le sa aveva ma Palemia i le Nofoaiga talu ai, ma ua le mafai ona faaauau lona galue i le tulai mai o le Malo fou ona o feteenaiga o aia (conflict of interest). Ua faamalolo le sa tauaveina le tofi Loia Sili, ma ua sui tulaga le susuga ia Sua Hellene Wallwork. E le i maea le mataupu i le tofi o le Failautusi o le Fono Faitulafono, e nafa lava lea ma lau Afioga i le Fofoga Fetalai.

O le faamavaega a le sa faauluulu i ai le Matagaluega o Tupe ua faia i luga o se maliega, i le va o ia ma le Minisita. Ua faamavae le taitaifono a le Komisi e Pulea le Aufaigaluega a le Malo, faapea le Komesina o Leoleo.

Ua ala ona ou ootoina nei mataupu ona o tofiga nei, e faamoemoe i ai faagaioiga o le Faigamalo ma ua tataua ona faia i ai se faaiuga i le tauamataga o le Pulega fou, mo le solosolo lelei o galuega i le agai atu i luma.

Lau Afioga i le Fofoga Fetalai, o lo o feagai pea le lalolagi atoa ma le faamai o le Koviti 19. O lo o faaauau e lo tatou Malo fou puipuiga i lalo o le tulafono mo faalavelave faafuasei aemaise i le malupuipua, o o tatou tuaoi

mai femalagaaiga i le ea ma le sami. O lo o faasavali tui puipui mo o tatou tagata. E faafetaia le agalelei o a tatou paaga e pei o Áusetalia, Iapani ma Niu Sila, Faalapotopotoga tau atinae ma faaitulagi faapea le Malo Aafaatasi. O i latou nei ua tauala mai ai fesoasoani tau tupe, vailaau mo tui puipuia ma mea faigaluega mo tagata faigaluega, o lo o feagai ma auaunaga e tali ai le Koviti 19.

Lau Afioga i le Fofoga Fetalai, o le Samoa Airways o se tasi lea o atinae e poupouina ai le tamaoaiga o le atunuu. O lo o sailiili lo tatou Malo fou i faavae ma fuafuaga mo le tatou vaalele fou na amatalia e le Faigamalo talu ai, e tauala i le Kamupani Vaalele. O lo o maaleale le tamaoaiga i aafiaga o le Koviti 19, ma o se taimi faigata mo so o se atinae i le tulaga gafataulimaina. Ou te manatu ua le o toe mamao se taimi ona maua lea o se tonu mautu mo lea faamoemoe.

Lau Afioga i le Fofoga Fetalai, ou te fia tautala i mataupu tau pulega. O lo o i ai se vaaiga faale-faiga faavae a lo tatou Malo, e toe iloilo ma faaleleia itu pulega o le Malo i le Tafatolu o Pulega. Ia faamautuina le tulaga tutoatasi o itu nei o Pulega faafetauagai i matafaioi. Ua leva ona faatalanoaina ia tulaga mo le Fono Faitulafono. Ae ua agia foi I sea manaoga mo le faamasinoga. I le itu a le Pule Faatonu po o le Executive ua i ai foi se manatu e toe faafoi le pule o le afaigaluega a le Malo, i le Komisi e Pulea le Afaigaluega a le Malo i lona tulaga e tutoatasi sa i ai muamua. Ua avea mea ua aliae mai i le aafia o le afaigaluega i faiga faapolokiki i le faiga palota tele talu ai nei, ua tatau ai ona toe faamautu le afaigaluega a le Malo, o se tino faapolofesa e galue mo so o se Faigamalo e tulai mai i lea taimi ma lea taimi. Ia, ae le tio foi i le afaigaluega, pe afai ua nenefu laina i le va o le mea e ta'u o le Malo ma le ta'u o le Vaega Faaupufai. Aua o le toatele o i latou nei, latou te le i iloa se isi lava Malo, na o le Faigamalo a le HRPP, e 33 tausaga sosoo. E manaomia e soo se faigamalo se afaigaluega e lava tapena, aua o i latou e faatino galuega a le Malo. O i latou foi o lo o i ai le tomai ma agavaa e faamoemoe i ai Faigamalo. O le fautua ma le faatino o le latou matafaioi lea. O le Malo, o sui ia o le atunuu latou te faataatiaina faiga faavae ma faia faaiuga, o le tatou matafioi lea. Ae tāui mea uma i tiute ma matafaioi i le pule a le Tulafono.

Lau Afioga i le Fofoga Fetalai o le talaaga o le Vaega Faaupufai o le Faatuatua i le Atua Samoa ua Tasi, e ao ona faamauina i faamaumauga a lenei Palemene. O se Vaega Faaupufai na fofoa mai i Salafai, i le tau amata o le tausaga talu ai. Na lesitalaina ia Iulai i le tausaga e 2020, e 51 ona sui na tauvaina i le faiga palota tele ia Aperila o le tausaga nei. Ma na tulai mai sui e 24, na faaopoopo i le 24 sui tutoatasi e toalua (2), ona maua ai lea o le numera silia o le 26 mai le 51 o Nofoa o le Palemene. O le 26 lea ua faatulai mai ai le Faigamalo fou lenei.

O le sauniga o le aso 24 Me 2021, lea na tauaofia ai sui o le Palemene ma faatautoina i lumafale o le Maota nei, o se laasaga uiga ese i le

talafaasolopito o upufai o Malo. O se sauniga na faia i le faleie ma sui tulaga ai ni loa faamauina, i e maufi o lo o faasino mai e le Tulafono Faavae e faatinoina lea sauniga, na le 'au mai mo lea faamoemoe. O le sauniga na faamalieina ai faasinoga o le Tulafono Faavae i le taimi e tataua ona tauaofia ai le Palemene. Ua faamaonia e le Faamasinoga lea sauniga, ma o le faavae lena o le Faigamalo fou, ma tusa ai foi ma le filifiliga a le atunuu, e ala i lana palota.

Lau Afioga e amata sau faamatalaga i le tulaga ese o se vaaiga i le le atoa o le nofoia o Nofoa o itumalo e 51. Ua agiga foi le faaiuga a lau Afioga i le Fofoga Fetalai, e tusa ai i le le faatautoina o sui o le HRPP. Ua maua foi le faavae o lou finagalo, ona o le le talia ma le aloaia e lea vasega o faipule le Faigamalo fou o lo o tulai mai ai lau Afioga, i le tofi o le Fofoga Fetalai, ma ua i ou aao lava le pule o mataupu e faasino i le Palemene lenei. Sa matau ma le totoa le faasologa o lenei mataupu, i le faasalalauina o fetusiaiga i le va o lau Afioga ma le taitai o le HRPP, le susuga ia Tuilaepa. Ma e maofa le taofi i upu faasausili ma le faatauemu i lau afioga. E aumai pea le leo e faatonu mai ai le faiga e faatuto ai i latou e le Ao o le Malo, ma toe fai atoa se sauniga o le tauaofia o le Palemene ma faatautoina sui filifilia uma. Lau afioga ua malaga le vaa lena. Talofa e, ai ua galo, le augani atu a lenei itu, ina ia tauaofia le Palemene e faatino ai filifiliga e tusa ai ma finagalo o le atunuu. O ai ea na faia faiga e taofia ai le tauaofia o le Palemene? O ai na mafua ai le le faatautoina o faipule o le HRPP na tofia mai e o latou itumalo? E faalua ona tuuavanoa le faamasinoga i le Faigamalo le tumau a le HRPP, e tauaofia le Palemene. Sa latou teena ia avanoa. Ae ua a nei? Ia tatou te talanoa lava ia Haamanu ma lana laau, ua faaopeopea ia Nofoa o itumalo, ona o le naunau i le fia malo. E ui ua malolo i tulaga manino ma le malamalama i faiga faatemokarasi. Ua faamalau mai le le faavae faale-tulafono o lau faaiuga lau Afioga i le Fofoga Fetalai. Ae tau ia ina matou faapea atu, ua fetosoaina faapautolo (tulou) e Tuilaepa ma lana vaega le tulafono, le mamalu o tofi o le Malo tainane le atunuu i ana faufauga. Ua le toe i ai se tapasa i so o se tafa faale-soifuaga, ua faatamaia ma aafia tagata faigaluga ma le au maufi a le Malo, ma faaoloatauaina le atunuu i ana upu faasalalau. Ua le toe i ai se alofa.

A tuu mai i le tulafono, e leai se aiaiga e faatonu folau ai le faaopeopea lea ua ia taunuu i ai ia ma lana vaega. Ia lafo atu ia i le faatofalaiga i lau afioga le tulaga lea, atonu ua lata mai se malama mo le faamoemoe o Samoa. Ina ia maua se nofo lelei ma le fealofani i lana tu ma lana aganuu e faavae i le faaaloalo ma o tatou va tapuia.

Lau Afioga i le Fofoga Fetalai, e lua (2) ni tulafono o le a faagasolo i le tatou fonotaga lena. O le Tala Autu o le tupe mo le tausaga 2021/2022, o le a see ese mai le faagaoioiga o tupe faaalu a le Malo ma aiaiga o le Tulafono o Faalavelave Faafuasei, na amatatia e le faigamalo le tumau talu ai, ma tatou faaauu ai loa i le tulaga masani o le tala o le tupe a le Malo mo masina

o lo o totoe o le tausaga faale-tupe, ua faagasolo. O le a lafo atu i le saunoaga a le Minisita o Tupe e faamanino faiga faavae a lo tatou Malo fou, e faatino ai galuega e tauala atu i le faaso.

O le tulafono lona lua (2), o teuteuga o le tulafono o faiga palota, e toe faaleleia ai le faatinoga o palota aemaise i mataupu na aliae mai i faamasinoga talu ai nei, i mataupu tau soligatulafono i faiga palota, lea ua faatulai mai ai ni palota laiti.

Lau Afioga i le Fofoga Fetalai, o le tatou valaauina e faafae le sa o Samoa i lenei Paeaiga, ou te manatu ua lava tapena le Faatuatua i le Atua Samoa ua Tasi, e le ona o i tatou, ae o le finagalo o le Atua. Tatou tau manatu ma molimau i le tatou savaliga mai le la tausaga, e leai se poto po o se atamai o le tagata soifua e asaina le sami soua lea sa tatou folau mai ai, ma momoli mai i tatou i le taeao lenei. O lau tatalo, ia avea lenei Faigamalo e fai ma meafaigaluega a le Atua, o lo o faavae ai Samoa.

Ia manuia tele lau Afioga, i lou tulai mai e taiulu le Fono Faitulafono a Samoa. Ia faafualoaina le soifua o Le Ao Mamalu o le Malo, ae ia folau i lagima Samoa le atunuu pele.

Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Minisita a le Palemia.

FOFOGA FETALAI: Faafetai i lau Afioga i le Palemia mo lau saunoaga faafofoga foi le paia o le Maota, aemaise foi o le atunuu i le folasaga o lou finagalo le Taitai o le Malo. Malo faafetai, faamanuia le Atua i lau afioga i tiute tauave.

Ou te tapa ma le faaaloalo lau Afioga i le Sui Palemia mo le lafo.

Afioga Hon TUALA TEVAGA IOSEFO PONIFASO (Sui Palemia): Lau Afioga i le Fofoga Fetalai, ou te tulai ma le faaaloalo e faatu le lafo e faapea:

- 1. Ina ia faataatia i le Laulau a Fono le Saunoaga Faa-Minisita a le Palemia.*
- 2. Ina ia faataatia i le Laulau a Fono ia Faamaumauga aloaia uma na faamaonia ai le tofia ma le filifilia o le Palemene Lona XVII a Samoa ma le Faigamalo fou ua i ai nei.*

Faaluaina e le Minisita o Faatoaga, Minisita o Galuega, Felauaiga ma Atinae Eese, Minisita o le Siosiomaga ma Punaoa faalenatura.

Na faamaonia le lafo.

**TULAFONO TAU FAAOFI O LE FAATATAUINA
O TUPE 2021/2022 - faitauga muamua.**

FOFOGA FETALAI: Tulai mai lau Afioga i le Minisita o Tupe.

Susuga Hon MULIPOLA ANAROSA ALE MOLIOO (Minisita o Tupe): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2021/2022 i lona faitauga muamua.*

Faaluaina e le Minisita mo Faatoaga, Minisita mo Galuega, Felauaiga ma Atinae Eeseese, Minisita mo Pisinisi, Alamanuia ma Leipa.

Na faamaonia le lafo.

**TALA FAATATAU AUTU O TUPE 2021/2022
–faataatia i luga o le Laulau a Fono.**

FOFOGA FETALAI: Ou te tapa lau Afioga i le Minisita o Tupe.

Na faataatia i luga o le Laulau a Fono e le Minisita o Tupe, Afioga Hon Mulipola Anarosa Ale Molioo le Tala Faatatau Autu o Tupe 2021/2022.

**TULAFONO TAU FAAOFI O LE FAATATAUINA O TUPE
2021/2022 – faitauga faalua**

FOFOGA FETALAI: Tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2021/2022 i lona faitauga faalua.*

Faaluaina e le Minisita mo Faatoaga, Minisita mo Galuega, Felauaiga ma Atinae Eeseese ma le Minisita mo Pisinisi, Alamanuia ma Leipa.

FOFOGA FETALAI: Saunoaga o le Tala Faatatau Autu o Tupe 2021/2022.

O le avanoa lenei mo le Saunoaga o le Tala Faatatau o Tupe 2021/2022.
Ou te tapa lau Afioga i le Minisita o Tupe mo lau saunoaga.

SAUNOAGA O LE TALA FA'ATATAU AUTŪ O LE TUPE
2021/22

Lau Afioga i le Fofoga Fetalai ma le mamalu o le Palemene o Samoa.

Ou te muamua ona ou faatalofa atu i lau Afioga o le Fofoga o le Fono i lenei taeao fou.

Ou te faatalofa atu foi i lau Afioga i le Tamaitai Palemia ma lau Kapeneta mamalu.

Ou te ofo alofa atu ma faatalofa atu i Sui uma ole Palemene i lenei Aso.

Ou te faatalofa atu i Ofisa Sili o Matagaluega ma Faalapotopotoga a le Malo. Malo le soifua manuia. Malo le lagi e mama.

Ou te faapai atu foi i le faafofoga tapuai mai o si o tatou atunuu, Samoa aoao i ou mamalu faale-Talalelei, mamalu faale-Atunuu ma ou mamalu faale-Malo. Tulouna ia.

E le faagaloina foi le tapuaiga a le tatou aiga i le Motu i Sasae aua Tutuila ma Manua.

Tainane le tapuai mamao mai i le paia ma le mamalu o Samoa o loo alaala ma papaaao i atunuu e mamao. Poo fea lava le tafa o le lalolagi o loo e tapuai mai ai ma tautua si o tatou atunuu ma le Malo. Ou te ofo alofa ma ou faatalofa atu.

Lau Afioga i le Fofoga Fetalai, o le faavae autu o le Tala o le Tupe 2021/2022 *"Ia toe poupuu, atia'e ma fa'asoa tatau le tamaoiga mo le si'itia o le soifua manuia o tagata uma o Samoa"*.

O le manu lauti o le Faigamalo Filifilia: *"O lou aiga, O ou Tagatanuu, O lou Atunuu ma lau Aganuu ma le Faakerisiano o le tatou Matafaioi Tauave faatasi lea"*

Lau Afioga i le Fofoga Fetalai, afai e le atinae e le Alii le Fale, e galulue fua i latou o e atinaeina.

Afai e le leoleoina e le Alii le aai, e mataala fua i latou o e leoleoina.

E le sili mea ua fai i lē na faia mea. E le sili foi le na auina atu i le na auina mai. Ma e le sili foi le auauna i lona matai.

Lau Afioga i le Fofoga Fetalai ma le Palemene o Samoa.

E tusa ai ma le Tulafono Tumau 131, e ia te au le ava tele ou te tu'uina atu ai i luma o le laulauafono a le Palemene le uluai Tala Fa'atatau Autu ole Tupe 2021/2022 e avea ai au e fai ma sui o le Malo – o le uluai faigamalo a le Vaega Fa'aupufai o le Fa'atuatua i le Atua Samoa ua Tasi (FAST). O lenei Tala Autu o le Tupe o se tala o le tupe o fesuaiga o faigamalo ma e

fa'alupeina o le Tala ole Tupe e "*Poupou, atia'e ma fa'asoa tatau le tamaoaiga mo le si'itia o le soifua manuia o tagata uma o Samoa*".

Lau Afioga i le Fofoga Fetalai,

Ae ou te le'i tolaulauina atu vaega taua o lenei Tala Autu ole Tupe, e muamua pea ona si'i le viiga ma le fa'afetai i le Atua ona o lana tausiga ma lana puipuiga ia Samoa, o lo'o malupuipua pea si o tatou atunu'u mai le fa'amai o le koviti-19. Fa'afetai fa'apitoa mo tatou paaga mo le loto fesoasoani ma le agalelei e ala i tui puipui o le Koviti-19 fa'atasi ai ma le tele o fesoasoani o lo'o auala eseese mai mo Samoa ma ona tagata. E fia momoli atu foi la'u fa'afetai fa'apitoa i lo tatou atunuu, ona ole alualu pea i luga ole fuainumera o i latou ua ma'ea ona fai tui puipua ole Koviti-19. Fa'amalo i le Vaega Tumaoti fa'apea le aufaigaluega a le Malo o lo'o tautua pea aua le puipua o le tatou atunuu mai lenei fa'ama'i ua a'afia uma ai le lalolagi.

Lau Afioga i le Fofoga Fetalai,

O lenei uluai Tala ole Tupe 2021/2022 sa manaomia se taimi e toe faatulagaina ai lona fa'ava'a, aemaise ole fetu'unaiga o vaegatupe ina ia toe aga'i le fa'asoaina o le tamaoaiga o le Malo i le fa'amuamua lea o auunaga e si'itia ai le soifua manuia o tagata uma o Samoa. O lo'o tumau pea le fa'amuamua a le faigamalo lenei ia puipua Samoa mai le fa'amai ole Koviti-19. Ae le o fa'atuatuanai ai le tali atu i a'afiaga ua iai nei le pa'u ole tamaoaiga ona o tapu fa'apea le tapunia o tatou femalagaiga fa'ava-o-malo. E tele ma anoanoai lu'itau sa fetaiai ma si o tatou atunu'u i le paeaiga fa'atoa mavae atu nei, e aafia ai ma le gasegase o upufai a Malo ina ua mae'a le faiga palota ia Aperila 2021. O le fuafuaga a le tatou faigamalo ua tu mai i le foe, o le Tala o le Tupe lenei ole a amata ai ona poupou, atia'e ma fa'asoa tatau le tamaoaiga o le Malo mo le si'itia o le soifua fiafia ma le manuia o tagata uma o Samoa.

O le manulauti foi lenei a le faigamalo filifilia, o lo'o fa'amoemoe e ausia lea i le fa'atauaina o ni faiga fa'avae atu e pei o lenei

- i. O le fa'aleleia o le soifua manuia.
- ii. Ia ausia se tamaoaiga e gafataulimaina.
- iii. Ia fa'atuatua ma lelei pulega.
- iv. Ia maua se siosiomaga puipua ma le saogalemu.
- v. Ia fa'atulaga ma fa'atino lelei atina'e ma galuega tetele ia umi ma lelei lona fa'aaogaina.

II. VA'AIGA TAULA'I I LE LUMANAI

Lau Afioga i le Fofoga Fetalai,

E ui o lo'o fuafua le toe fa'atupulaia lemu ole tamaoaiga ile 2% i le fa'aiuga o le tausaga faaletupe 2021/2022, o lo'o i ai pea le tamaoaiga o Samoa i se tulaga pagatia i le taimi lenei ona o a'afiaga o le fa'amai ole Koviti-19. O lenei Tala Autu o le Tupe ma ona vaega uma e fa'amoemoe o le a toe fa'agaioi ai le tamaoaiga o Samoa e ala lea i galuega fa'atino a le Malo aemaise o fa'amamaavega talafeagai o le a mafai ona tu'uina sao atu i lima o e o lo'o a'afia.

O le fua o le aofaiga o aitalafu a le Malo o lo'o faaaogaina le tapula'a ia lē sili atu ma le 50% o le tamaoaiga i le taimi lenei. O lea tapula'a sa 40% o le tamaoaiga i tausaga ua mavae. O le aofaiga o le aitalafu a Samoa o lo'o i ai nei, ua ausia le \$1.0 piona Tala (pe tusa lea ma le 50% o le tamaoaiga). O se tulaga faigata lea ua feta'iai ma le Malo fou, ona o lea o le a amo uma le toe totogiina o aitalafu a le faigamalo talu ai aemaise o lea ua ausia le tapula'a 50% lea e fa'agata mai ai aitalafu a le Malo. I le agai i luma, o le a galue loa le Malo i ni polokalame e toe fa'amautuina ai faiga fa'avae o aitalafu ina ia mafai ai ona tu'uititia ma gafatia le fa'atupeina o ni atina'e aemaise o le i ai pea o le vaegatupe e tua i ai le fa'atupeina ole Tala o le Tupe i taimi o fa'alavelave fa'afuasei aemaise o mala fa'alenua e ono a'afia ai le atunu'u i le lumanai.

O le tausaga fa'aletupe 2020/21 sa fuafuaina ai se fa'asili o tupe alu nai lo'o tupe maua e tusa lea ma le -3.2% o le fua o le Tamaoaiga. O le Tala ole Tupe o lo'o i luma nei ole laulauafono a le Palemene o lo'o fuafua se fa'asili i Tupe Alu nai lo'o Tupe Maua e tusa lea ma le - 2.5% ole fua o le Tamaoaiga. O le a fa'aaau pea ona aoina ma fuafua lelei tupe maua ma tupe fa'aalu a le Malo ina ia pulea lelei, ia fa'atupulaia tupe maua ma fuafua tatau tupe alu, ia galulue le aufaigaluega a le Malo i se tulaga e pito sili ona lelei, ma ia tapenapena mo fa'alavelave e oso fa'afuasei e pei o mala fa'alenua, fa'amai ma isi.

Lau Afioga i le Fofoga Fetalai,

E pei ona fa'ailoa atu muamua, o le talitonuga a le faigamalo filifilia e mafai ona toe fa'atupulaia lo tatou tamaoaiga i se tulaga maua ma gafataulimaina pe afai o le a galulue uma tagatanuu o Samoa e atina'e lona tamaoaiga ma ia fa'atupulaia ma fa'asoasoa tatau i atina'e mo le manuia lautele, e aofia ai atina'e o le a mafai ona fa'amatuuina atu e le Malo i nu'u ma itumalo mo le galueaina aua le soifua manuia o fanau, aiga, nu'u ma Ekalesia.

Lau Afioga i le Fofoga Fetalai,

O lenei Tala ole Tupe ua aofia ai nisi o faiga fa'avae fou o lo'o mafai ona fa'atinoaina ma fa'atupeina i lenei tausaga faaletupe. O le a mafai foi ona fesoasoani lea i le toe fa'atupulaia o le tamaoaiga.

1. Fa'aleleia o le Soifua Manuia

- Penisione mo Tinā ma Tamā Matutua
O le a si'itia le penisione mai le \$160 i le \$200 i le masina.
- Penefiti mo tagatanu'u e i ai mana'oga tumau.
- Fesoasoani mautu mo le Fausiaina o Fale i tausaga uma mo ē lima vaivai ma lē tagolima.
- Fesoasoani mo Fa'alapotopotoga o lo'o tautuaina le atunu'u e ala i auaunaga fa'apitoa mo tinā ma tamā matutua fa'atasi ai ma ē o lo'o i ai mana'oga tumau.
- Fesoasoani mo le sauaina o tina ma tamaiti o lo'o fa'atupulaia pea, pe tusa ma le 52.3% o tina ma tamaitai e i totonu ole 15-49 tausaga le matutua o lo'o sauaina. O le a fa'amatu'u sa'o nei fesoasoani i fa'alapotopotoga o lo'o fa'atinoaina nei matafaioi. O le naunautaiga ina ia tafiese nei uiga mataga.
- Fesoasoani mo Fa'alapotopotoga o lo'o uuna'ia polokalame e tu'uitiitia ai tino puta ma isi fa'ama'i lē pipisi; e sili atu i le 50% o tamaiti i le va ole tausaga 5 agai le 19 ua maua i le tino puta. Ua sili atu i le 55% le numera o tina ua maua i le tino puta ma o le kuata o tagata matutua o le atunu'u ua maua i le ma'i suka. O ni vaegatupe fa'asoa aoga mo le soifua maloloina o tatou tagata.

2. Si'itia o tulaga tau Soifua Maloloina

- Fa'atupeina Taumafataga mo Gasegase Taofia i Falema'i uma o le atunu'u
- Falema'i Fa'a-Itumalo
Ua amata nei galuega aua le fa'aleleia ma le fa'atogaina o falema'i fa'a-itumalo uma o le atunu'u;
- Fesoasoani mo Komiti Tumamā

O le a fa'aauau le fesoasoani atu a le Malo i Komiti Tumamā ina ia mafai ai ona latou ta'imua i polokalame ma atina'e uma tau soifua maloloina i nu'u ma alaalfaga.

- Vaega toe fa'aleleia i le Falema'i i Moto'otua
Ua fa'atatauina vaegatupe aua le va'ava'aia lelei ma le toe fa'aleleia o le falema'i i Moto'otua aua le mamalu o le atunu'u o lo'o fa'aaogaina nei auaunaga;

3. Soifua A'oa'oina

- Totogi mo Faia'oga
Ua si'itia nei le fesoasoani a le Malo mo a'oga uma o le atunu'u aua le totogiina o faia'oga.
- Atina'ega o Ta'aloga
Ua si'itia nei tupe fa'atatauina mo le atina'ega o ta'aloga ma asosi o ta'aloga eseese.

4. Tupulaga, Tina ma Tamaitai faapea Ekalesia

- O lo'o i ai vaegatupe fa'atatauina e fesoasoani atu ai ile atina'eina o fa'alapotopotoga o lo'o taulamua i le atinaeina o tupulaga, tina ma tamaitai aemaise o Ekalesia.

5. Atinae'ina o Fa'ato'aga ma Faiga Faiva

- Oloa auina atu i fafo
O lo'o iai vaegatupe fa'atatauina e fa'avaeina ai se Pulega mo Oloa Auina atu i Fafo e mata'ituina ai maketi aemaise ai le fa'amausalīina o le feso'ota'iga i le vā o tatou tagatanu'u ma pisinisi i atunu'u mamao aua le auina atu i fafo o fua o fa'a'ele'eleaga aemaise ai oloa gaosiina i totonu o si o tatou atunu'u.

6. Fa'atupula'ia o Pisinisi

- Fesoasoani mo Pisinisi
Ua fa'aagaga nei vaegatupe e fesoasoani atu ai i pisinisi o lo'o a'afia ona o le tapunia o tuaoi fa'avaomalo o le atunu'u e aofia ai pisinisi laiti ma pisinisi feololo. O lenei fesoasoani e aofia ai ma auaunaga tau tagata tafafao maimoa mai fafo e ese mai faletalimalo e aofia ai fale'aiga, ofisa femalagai, mata'aga ma isi.

7. Fa'aleleia o Atina'e Turisi

- Fesoasoani mo Faletalimalo

O lo'o iai vaegatupe fa'aagaga e fa'amatu'uina atu sa'o i faletalimalo e fesoasoani ai ona ole a'afia o latou pisinisi ona o le tulaga pagatia olo'o iai le Vaega o Turisi ona ole Koviti19. O lenei fesoasoani e fa'amoemoe ole a mafai ai ona toe fa'aleleia a latou pisinisi ma tapenapena mamao aua le toe tatalaina o tuaoi fa'ava-o-malo i le taimi e tu'uitiitia ai le pepesi o le Koviti19 i le lalolagi.

8. Atina'eina o Itumalo ma Nu'u

- Ua amata nei tapenaga e tu'ufa'atasi ai faiga fa'avae ma ta'iala mo le fa'avaeina lelei ma le atinae o itumalo ina ia mafai ai ona latou fa'atinoina ma va'ava'aia a latou atina'e o lo'o fuafuaina e tusa ai ma atina'e o lo'o fuafuaina i a latou taiala o atina'e.
- Ua si'itia totogi o Tina ma Tama o lo'o aveva ma Pulenuu ma Sui o le Nuu. Ua atoa le sefulu (10) tausaga e le'i i ai se si'itaga o latou totogi ae ua fa'atupulaia o latou tiute tauave e ala i galuega fa'atino a le Malo i nu'u i tua.

9. Fa'atulagaga o Tulafono

Iloiloga o Tulafono

O lo'o iai vaegatupe fa'aagaga aua le toe iloiloaina o le Fa'avae o le Malo Tutoatasi o Samoa.

• 10. Sueina o Tulaga Tau Tupe mo le Fa'aleleia

Fa'agaioiina o Tupe ma Faiga Fa'avae Tau Tupe a le Malo Ua fa'aagaga nei vaegatupe aua le iloiloaina o faiga fa'avae ma tulaga uma o lo'o fa'agaioiina ai tupe a le Malo ina ia mafai ona si'itia auaunaga ma le lipotiina o tupe alu ma tupe maua a le Malo.

• 11. Si'osi'omaga Puipuia

Atina'e o Vaomatua

O lo'o iai vaegatupe aua le ūna'ia lea o le toe totoina ma le fa'asaoina o vaomatua uma o le atunu'u.

12. Fa'amama avega ma le Fa'aleleia o Auaunaga Lautele

Pa'u Tau ole Eletise ma le Suavai

O lo'o manaomia pea e tagata se fa'amama avega. E 20% o le a tu'uitiitia ai le tau o le Eletise ma le Suavai ma o lo'o galulue nei Pulega e fa'atino faiga fa'avae ina ia mafai ona fa'amamaluina lenei pa'u e amata lona fa'amamaluina i le Aso 1 Novema 2021.

□ Si'itia le tulaga puipuia o gataifale o Manono ma Apolima ina ia mafai ona tali atu i a'afiaga ona o le fesuia'iga o le tau; ua fa'agaga nei vaegatupe aua se iloiloga i luga o atina'e ma polokalame e mafai ona fa'atinoina aua le malupuipuia o gataifale mai le fesi'isi'ita'i o le tai aemaise ai a'afiaga ona o le fesuia'iga o le tau o lo'o lamatia ai tagata o lo'o alaala ma aumau ai i nei motu laiti ole atunuu.

● **13. Fa'aaogaina o Tekonolosi**

□ Initaneti mo A'oga

Ua fa'aagaga nei i le tausaga fa'aletupe o lo'o talanoaina se vaegatupe e amata ai ona auina atu le auaunaga e leai se totogi mo nisi o a'oga a le atunu'u aua lava le fa'atinoina o polokalame fa'alea'oa'oga a le fanau i luga o upega tafā'ilagi.

● **14. Tu'uitiitia Tau e Totogi e le Mamalu ole Atunuu mo Auaunaga a le Malo ile 20%**

O le a tu'uitiitia i le 20% nisi o tau o auaunaga a le Malo e fesoasoani ai i le tau o le soifuaga e le gata mo tagata lautele ae fa'apea foi pisinisi tumaoti a o feagai ai le atunu'u ma a'afiaga ona o le Koviti19. O nei auaunaga e aofia ai:

- i. Lesitalaina o ta'avale afi (*private vehicles*), ta'avale la'u pasese ma pasi;
- ii. Laisene o Pisinisi;
- iii. Tupe Totogi mo Su'ega a le Malo (*National Examination Fees*);
- iv. Tupe Totogi mo Fa'amasinoga Tau Fanua ma Suafa;
- iv. Tau o le va'aiga o gasegase i le Falema'i (*consultation fees*);
- v. Laisene mo 'alia;
- vi. Tau o Tusi Folau;
- vii. Pemitā mo le fausiaina o fale.

IV. OTO'OTOGA O LE TALA O LE TUPE

Lau Afioga i le Fofoga Fetalai,

O le a ou otoina atu loa vaega uma o le Tala Fa'atatau o le Tupe mo le Tausaga Fa'aletupe 2021/22:

Tupe Maua	\$ 876,362,251.89
Tupe Maua Masani	\$ 635,147,203.03

Tupe Faameaalofa mai Fafo	\$ 241,215,048.86
<u>Tupe Faaalu</u>	\$ 982,580,130.08
Tupe Alu Faale-Tulafono	\$ 109,570,916.06
Polokalame o Tupe Alu	\$
700,213,021.42 Tupe Faaalu le Fuafuaina	\$
21,006,390.64	
Tupe Faaalu mo Atinae	\$ 151,789,801.95
<u>Faasiliga a Tupe Alu I Tupe Maua</u>	\$ (106,217,878.19)
Faatupeina mai:	
Nonogatupe e mama tului	\$ 2,193,766.21
<u>Faasiliga Faaiu Fuafuaina o Tupe Alu i Tupe Maua</u>	\$ (104,024,111.98)

O le aotelega o le Tala i le Tupe ua fa'amoemoe e fa'amauina ai se fa'asiliga o tupe alu nai lo'o tupe maua e tusa lea ma le \$106.2 miliona talā. A fa'atulaga i lalo o le Auivi o Fa'amaumauga o Tupe a le Malo po'o le Government Finance Statistics (GFS)¹, ona maua ai lea o le aotelega o le fa'asiliga o tupe alu i tupe maua a le Malo e tusa ma le \$53 miliona tala, po'o le 2.5% o le tamaoaiga.

V. FA'AVAE O TUPE MAUA

Lau Afioga i le Fofoga Fetalai,

O le aotelega o Tupe Maua a le Malo e fa'amoemoe o le a si'itia i le 3% mo le tausaga fa'aletupe 2021/22 ma e afua mai lea i le maualuga o le taulaga o lo'o maitauina mo le aoina mai lea o lafoga i totonu o le atunu'u e ui i aafiaga o le Koviti19.

O le aotelega o Tupe Maua Masani a le Malo (Ordinary Receipts) lea o lo'o tu'ufa'atasia ai Lafoga ma Tupe Maua e Ese mai i Lafoga, e fa'amoemoe o le a si'itia i le 7%.

E pei ona silafia e Sui mamalu, o le tausaga fa'aletupe 2020/21 sa tu'uititia ai le va'aiga taula'i mo le aoina mai o *Lafoga* ona o le manatu ina ne'i fa'ateteleina a'afiaga o le Koviti ma a'afia ai le feoai mai o va'a la'u oloa i le atunu'u. Peita'i sa maitauina le maualuga pea o le aoina mai o Lafoga i le tausaga fa'aletupe ua tuana'i ma o le ala lea ua toe siitia ai le va'aiga taula'i i le 11% mo le tausaga 2021/22.

O *Tupe Maua e Ese mai i Lafoga* e fa'amoemoe o le a pa'ū lea i le 26% e tusa ai ma faiga fa'avae mo le tu'uitiitia o nisi o tau o auunaga a le Malo e pei ona ou tā'ua muamua.

O *Tupe Fa'ameaalofa mai i Pa'aga masani a le Malo mai Fafo* e fa'amoemoe e ono tu'uitiitia i le 6% ma o lo'o atagia ai le fa'amae'aina ai o nisi o fesoasoani tu'u sa'o (budget support) sa auina mai i nisi o pa'aga masani a le Malo aua le polokalame mo le tali atu i a'afiaga o le Koviti19.

VI. GALUEGA FA'ATINO MA ATINA'E O LO'O AVE IAI LE FA'AMUAMUA

Lau Afioga i le Fofoga Fetalai ma Sui Mamalu o le Palemene,

O le aotelega atoa o tupe alu fuafuaina mo le tausaga o lo'o loma nei 2021/22 e \$982,580,916. O lenei aotelega o lo'o aofia ai tupe alu mo atina'e fa'atupeina mai fafo ma e 0.6% ua si'itia ai pe a fa'atusa i le tausaga fa'aletupe 2020/21.

O lenei si'itaga itiiti e ui i le tele o nisi o faiga fa'avae fou, o lo'o atagia mai ai le galuega tele sa fa'atinoina e le faigamalo ina ia mafai ona toe fetu'una'i tupe mo galuega fa'atino a Matagaluega ma Ofisa a le Malo e aofia ai ma fa'amamaavega o le a fa'amatu'uina i vaega o le tamaoaiga o lo'o a'afia.

Lau Afioga i le Fofoga Fetalai,

O le a ou oto'otoina atu vaegatupe ua fa'atauinaina mo Matagaluega ta'itasi mo le tausaga fa'aletupe 2021/22:

1. *Matagaluega o Fa'ato'aga ma Faiga Faiva - \$14,467,881*

- \$12,075,171 mo Galuega Fa'atino a le Matagaluega
- \$2,392,709 mo Galuega e Avea ai ma Sui o le Malo

O nisi o faiga fa'avae tetele o lo'o i Galuega e Avea ai ma Sui o le Malo e aofia ai:

- \$140,437 le sao a le Malo mo se tasi o Poloketi e Atina'e ai Fa'ato'aga Laiti;
- \$50,000 mo le Animal Protection Society -
- \$250,000 e fa'avaeina ai se Pulega mo Oloa Fa'atauina atu i Atunu'u i Fafo;
- \$500,000 mo le Fa'aaliga o Fua o Fa'a'ele'eleaga;

2. ***Fa'alapotopotoga o Suesuega Fa'asaienisi a Samoa - \$5,715,385***

□ \$5,474,441 mo Galuega Fa'atino a le Fa'alapotopotoga □
\$240,944 mo Galuega e Avea ai ma Sui o le Malo.

3. ***Matagaluega o Pisinisi, Alamanuia ma le Leipa - \$7,811,255***

- \$5,453,543 mo Galuega Fa'atino a le Matagaluega.
- \$1,907,713 mo Galuega e Avea ai ma Sui o le Malo.

Faiga Fa'avae Tetele o lo'o i Galuega e Avea ai ma Sui o le Malo

- \$450,000 mo le Samoa Business Enterprise Centre
- \$250,000 mo le Fesoasoani masani a le Malo mo le Vaega Tuma'oti
- \$178,000 mo le Polokalame fa'a-Aperenitisi
- \$124,021 mo le Polokalame fa'atekonolosi mo le resitalaina o Pisinisi.

4. ***Pulega o Tagata Tafafao Maimoa mai Fafo - \$19,897,810***

- \$7,193,161 mo Galuega Fa'atino a le Pulega;
- \$12,704,649 mo Galuega e Avea ai ma Sui o le Malo.

Faiga Fa'avae Tetele o lo'o i Galuega e Avea ai ma Sui o le Malo

- \$5,493,560 mo le fa'alauiloaina po'o le maketiina o le atunu'u
- \$5,000,000 e fesoasoani ai i faletalimalo ua a'afia ona o le tapunia o tuaoi fa'avaomalo
- \$200,000 mo polokalame fa'alauiloa tau turisi i totonu o le atunu'u
- \$400,000 mo le atina'e o le Agro Tourism Park

5. ***Matagaluega o Fesootaiga ma Fa'amatalaga Fa'atekonolosi - \$8,817,852***

- \$2,936,881 mo Galuega Fa'atino a le Matagaluega
- \$5,880,971 mo Galuega e Avea ai ma Sui o le Malo

Faiga Fa'avae Tetele o lo'o i Galuega e Avea ai ma Sui o le Malo

- \$1,120,128 mo lisi o pou o feso'ota'iga o lo'o fa'aaogaina mo le Samoa National Broadband Highway po'o le SNBH
- \$246,510 mo le totogiina o peau fa'asalalau o lo'o fa'atinoina ai auaunaga a le SNBH
- \$315,000 mo le eletise o lo'o fa'aaogaina e le SNBH
- \$525,012 e totogiina ai le CSL aua le va'ava'aiga o le SNBH

- \$300,000 mo le Ofisa Tutotonu o le Digital TV a le Malo
- \$2,000,000 aua le tu'uina fua atu o auaunaga tau initaneti i nisi o aoga o le atunu'u e le'i maua lea auaunaga.

6. Ofisa o le Pule Fa'atonu - \$2,365,630

- \$1,977,831 aua Galuega Fa'atino a le Ofisa
- \$387,799 mo Galuega e Avea ai ma Sui o le Malo

7. Matagaluega o A'oa'oga, Ta'aloga ma Aganuu - \$105,877,332

- \$77,052,578 auā Galuega Fa'atino a le Matagaluega
- \$10,008,434 mo Galuega e Avea ai ma Sui o le Malo
- \$1,090,000 mo le atina'ega o ta'aloga e aofia ai vaega nei:
 - \$500,000 e fesoasoani ai i atina'e o asosi eseese o ta'aloga;
 - \$350,000 mo le Iuni Lakapi o Samoa
 - \$50,000 mo le atina'ega o ta'aloga mo tagata e iai mana'oga tumau po'o le Special Olympics
 - \$150,000 mo le Asosi Netipolo a Samoa

Faiga Fa'avae Tetele o lo'o i Galuega Avea ai ma Sui o le Malo

- \$300,000 mo malae ta'alo a a'oga ma itumalo;
- \$1,500,000 mo le polokalame sikolasipi e si'itia ai fa'ailoga taualoa mo faia'oga;
- \$4,670,170 vaegatupe mo le fa'atinoina o polokalame i lalo o le Fuafuaga Alualu mamao a le Vaega Ma'oti mo A'oa'oga lea o lo'o fesoasoani mai ai Malo o Ausetalia ma Niu Sila;
- \$285,454 mo le Komisi o le Gagana Samoa;
- \$472,662 mo le Pulega o Fa'amaumauga po'o le National Archives & Records Authority.

8. Pulega o Fa'ailoga ma Tusi Pasi Tauloa o Samoa - \$5,676,728

- \$2,996,117 auā Galuega Fa'atino a le Pulega;
- \$2,680,611 mo Galuega e Avea ai ma Sui o le Malo.

Faiga Fa'avae Tetele o lo'o i Galuega Avea ai ma Sui o le Malo

- \$2,338,832 vaegatupe mo le fa'atinoina o polokalame i lalo o le Fuafuaga Alualu mamao a le Vaega Ma'oti mo A'oa'oga lea o lo'o fesoasoani mai ai Malo o Niu Sila ma Ausetalia;

9. Pulega o Fale ma Malae Ta'alo a Samoa - \$2,531,743

- \$2,407,051 mo Galuega Fa'atino a le Pulega;
- \$124,692 auā Galuega e Avea ai ma Sui o le Malo

10. Le Iunivesite Aoao o Samoa - \$28,585,128

- \$24,606,400 mo Galuega Fa'atino a le Iunivesite;
- \$3,978,728 auā Galuega e Avea ai ma Sui o le Malo.

Faiga Fa'avae Tetele o lo'o i Galuega Avea ai ma Sui o le Malo

- \$3,280,518 vaegatupe mo le fa'atinoina o polokalame i lalo o le Fuafuaga Alualu mamao a le Vaega Ma'oti mo A'oa'oga lea o lo'o fesoasoani mai ai Malo o Ausetalia ma Niu Sila.

11. Matagaluega o Tupe - \$101,485,066

- \$15,227,121 mo Galuega Fa'atino a le Matagaluega; □ \$86,257,945 auā Galuega e Avea ai ma Sui o le Malo.

Faiga Fa'avae Tetele o lo'o i Galuega Avea ai ma Sui o le Malo

- \$300,000 mo tapenaga masani auā le Fa'amanatuina o le Tutoatasi;
- \$680,318 mo le sao a le Malo i le Poloketi mo le Lotoā o Tane Suauu; \$200,000 auā le sao a le Malo i le Agri-Business Project;
- \$250,000 mo le Polokalame o Inisiua aua Fa'alavelave Fa'alenua mo atunu'u o le Pasefika;
- \$144,291 mo le sao a le Malo i le Polokalame mo le Si'itia o le mafai ona Tali Atu i A'afiaga Matuiā o le Fesuia'iga o le Tau;
- \$750,000 mo le sao a le Malo i le Poloketi mo le Si'itia o Feso'ota'iga Fa'aneionapo lea o lo'o fa'atinoina ai le tatou National ID;
- \$100,000 mo le sao a le Malo i le Poloketi mo le fa'aleleia o le auala tele i le itu sisifo o le taulaga lea e aga'i atu i le malae va'alele;
- \$500,000 mo le sao a le Malo i le Poloketi mo le Atina'ega o Uafu;
- \$100,000 mo le sao a le Malo i le fausiaina o le a'oga fa'apitoa mo Leoleo (Samoa Police Academy);
- \$100,000 mo le sao a le Malo i le toe fa'alelei lea o le nofoaga lea o lo'o i le ele'ele fou po'o le Friendship Park;

- \$100,000 mo le sao a le Malo i le Cultural Centre lea o lo’o i Malifa i lalo o le Matagaluega o A’oga, Ta’aloga ma Aganu’u;
- \$100,000 mo le sao a le Malo i le Poloketi mo le si’itia o tulaga o auala ma fela’ua’iga ina ia mafai ona tali atu i a’afiaga o le fesuia’iga o le tau po’o le Samoa Climate Resilient Transport Project;

FOFOGA FETALAI: Ua ou vaelupeina le saunoaga a lau Afioga i le Minisita o Tupe. Ou te talitonu foi o se avanoa lea e fai ai sina au koma ma e malolo ua umi ona e tulai.

Ona o lea ua oo mai i le tatou taimi malolo, o lea e faaauau ai lau saunoaga pe a tatou taliu mai i le tatou malologa.

Ou te faasilasila atu o le a faataatiaese Galuega a le Fono Aoaofa Faitulafono mo lana malologa masani.

Na faataatiaese Galuega a le Fono Aoaofa Faitulafono mo lana malologa masani i le itula e 11:00 ma toe amatalia i le itula e 11:44.

Na toe faaauau le Saunoaga a le Minisita o Tupe i le Tala Faatatau Autu o Tupe 2021/2022.

FOFOGA FETALAI: Ou te talitonu o lea ua to i tua le ala i sao ua maea le tautega mo le faasiliga malosia o le paia o le Palemene e faaauau ai le tatou galuega.

E faataatiaese Galuega mo le malologa masani o lo o saunoa le Afioga i le Minisita o Tupe mo le Saunoaga o le Tala Autu o le Tupe. Ia, o le avanoa lenei ou te tapa ai lau Afioga i le Minisita o Tupe e te tulai mai e faaauau lau saunoaga.

Afioga Hon MULIPOLA ANAROSA ALE MOLIOO: Faafetai i lau Afioga i le Fofoga Fetalai. E manatu ua maea le taligasua ma ua maua foi le faasiliga malosia o lau Palemene. Faafetai i le Ofisa o le Fono mo le tautega.

E malolo le tatou Palemene ua oo mai le faasologa i vaegatupe mo le Matagaluega o Tupe.

- \$2,650,000 mo le Pamu Penisini a le Malo;
- \$4,201,551 auā le Inisiua mo Aseta a le Malo;
- \$711,000 mo le totogiina o laisene mo polokalame fa’atekonolosi o lo’o fa’aaogaina i galuega a le Matagaluega;
- \$410,000 mo le tau o le totogi fua pauina o laina feso’ota’i mo polokalame fa’atekonolosi a le Matagaluega;

- \$500,000 mo Sikolasipi fa'apitoa i le Iunivesite Aoao o Samoa auā le fanau a'oga ua lē mafai ona fa'auau a latou polokalame ona o le lima vaivai ma le lē tagolima;
- \$3,000,000 auā se polokalame mo penefiti mo tagatanu'u e i ai mana'oga tumau po'o Disability Benefits;
- \$200,000 mo le sao a le Malo i le Polokalame a le Faletupe a Asia mo Atina'e mo Tui Puipui;
- \$150,000 mo le sao a le Malo mo le Ofisa fou o le Ofisa o le Fono Aoao Faitulafono o Samoa;
\$500,000 mo le sao a le Malo i le fa'alauteleina ma le fa'aleleia o le auala tele mai i Tanugamanono e tau i Siumu;
\$2,000,000 mo le Polokalame o le fausiaina ma le toe fa'aleleia o fale mo tagatanu'u lima vaivai ma le lē tagolima;
- \$33,388,308 aua le Penisione mo Tagata Matutua o le atunu'u;
- \$3,500,000 mo tiute o oloa auina mai fafo auā le fa'atinoina o poloketi ma polokalame a le Malo;
- \$4,940,000 mo lafoga totogi i luga o le fa'atinoina o poloketi ma polokalame fa'atupeina e pa'aga masani a le Malo;
- \$200,000 mo lafoga totogi i luga o le fa'amae'aina o le toe fausiaina o le Maota o le Fono ma le Ofisa o le Fono Aoao Faitulafono;
- \$10,000,000 mo le Polokalame e fesoasoani atu i pisinisi e aofia ai pisinisi laiti ma pisinisi feololo o lo'o mautinoa o lo'o a'afia ona o le tapunia o tua'oi fa'avaomalo talu ai le pepesi o le Koviti19;
- \$250,000 e si'itia ai le tu'ufa'atasia o lipoti fa'aletausaga o Fa'alapotopotoga a le Malo;
- \$1,000,000 o le a fa'amatu'uina atu e fesoasoani ai i fa'alapotopotoga o lo'o fa'atinoina polokalame auā le tafiesea o sauaga o tinā, tama'ita'i ma tamaiti i totonu o aiga;
- \$1,000,000 e fa'amatu'uina atu e fesoasoani ai i fa'alapotopotoga o lo'o fa'atinoina galuega ma auaunaga aua le tu'uitiitia o fa'ama'i le pipisi ma le tino puta o tamaiti;
- \$1,000,000 e fa'aopopo i le saofaga a le Malo mo le Faletupe o Atina'e;
- \$1,000,000 e fa'aopopo i le saofaga a le Malo mo le Esetete Tausi;
- \$250,000 e fa'atinoina ai se su'esu'ega ma ni iloiloga i luga o tusi tupe ma faiga fa'avae tau tupe a le Malo;

12. Matagaluega o le Va-i-Fafo ma Fefa'ataua'iga - \$22,979,753

- \$19,702,562 mo Galuega Fa'atino a le Matagaluega ma o lo'o aofia ai ma ofisa uma a le Malo i atunu'u i fafo;
- \$3,277,190 mo Galuega e Avea ai ma Sui o le Malo;

Faiga Fa'avae Tetele o lo'o i Galuega Avea ai ma Sui o le Malo

- \$150,000 e tapena ai mo le fonotele mo fa'auluuluga o Malo uma o le Taupulega;
- \$150,000 mo le fonotaga o le Komiti mo Fefa'ataua'iga o atunu'u o le atu Asia, Karipiane ma le Pasefika;
\$150,000 mo le Fonotaga Fa'aletausaga mo le Fa'atalanoaina o Galuega fa'avaitaimi ma le Malo o Ausetalia;
\$300,000 aua le fa'ataunu'uina o le Fonotaga mo le sainiga lea o le Polokalame Fesoasoani ma le Iuni o Europa (EU-ACP Samoa Agreement Post Cotonou Signing);

13. Matagaluega o le Soifua Maloloina - \$126,715,844

- \$80,752,054 mo Galuega Fa'atino a le Matagaluega;
- \$37,438,790 auā Galuega e Avea ai ma Sui o le Malo.

Faiga Fa'avae Tetele o lo'o i Galuega e Avea ai ma Sui o le Malo

- \$2,000,000 mo le fa'afaigaluegaina o tausii soifua ma foma'i i le tausaga muamua talu ona latou fa'au'u mai a'o le'i fa'ase'e atu i tomai fa'apitoa i le falema'i;
- \$1,200,000 auā le fa'aleleiina ma le va'ava'aia lelei o alā paipa ma alā vai o le falema'i;
- \$3,949,144 mo le polokalame fa'apitoa o lo'o fa'atupeina e le Faletupe a le Lalolagi mo le tu'uitiitia o fa'ama'i lē pepesi;
- \$116,000 mo le sao a le Malo i nisi o polokalame fa'apitoa e patino i le vaega o le Soifua Maloloina;
- \$2,000,000 auā taumafataga mo gasegase taofia i falema'i uma o le atunu'u;
- \$4,600,000 mo vaila'au ma isi tulaga mo'omia mo auaunaga tau su'e toto;
- \$852,287 mo vaila'au ma isi tulaga mo'omia mo auaunaga tau gasegase o oloa;
- \$3,000,000 mo vaila'au ma isi tulaga mo'omia mo auaunaga tau talavai;
- \$6,000,000 mo vaila'au ma fuala'au talavai;
- \$590,000 mo Tui Puipui;
- \$145,000 mo pepa fa'apitoa e mo'omia i auaunaga tau fā'ata;

- \$3,000,000 auā le toe fa'aleleia o falema'i fa'atasi ai ma fale apitaga mo foma'i i itumalo;
- \$600,000 mo auunaga mo le puipuiga ma le saogalemu o le falema'i (Security Services);
- \$360,000 mo konekarate moa vao ma le fa'amamāina o lotoā o le falema'i;
- \$2,000,000 mo le fa'amamāina o le falema'i;

14. Fa'alapotopotoga Fa'avae Tau Fatu Ga'o o Samoa - \$9,046,544

- \$5,588,977 mo Galuega Fa'atino a le Fa'alapotopotoga;
- □ \$3,457,567 auā Galuega e Avea ai ma Sui o le Malo.

Faiga Fa'avae Tetele o lo'o i Galuega Avea ai ma Sui o le Malo

- \$2,850,000 mo vaila'au ma isi tulaga mo'omia e auina mai atunu'u i fafo;
- \$200,000 auā le tapenaina o le maota fou mo nei auunaga ina ia mafai ai ona fa'aaogaina masini fa'amamā vai tetele mo gasegase;

15. Matagaluega o Fa'amasinoga ma le Fa'afoeina o Tulaga Tau Fa'amasinoga - \$16,667,214

- \$12,363,410 mo Galuega Fa'atino a le Matagaluega; □ \$4,303,804 mo Galuega e Avea ai ma Sui o le Malo.

Faiga Fa'avae Tetele o lo'o i Galuega Avea ai ma Sui o le Malo

- \$250,000 mo auunaga fa'aloia tu'uina atu i le mamalu o le atunu'u e le mafai ona gafatia le tau o loia mo latou fa'amasinoga;
- \$200,000 mo le fa'aleleia o le tauluga o le Ofisa;
- \$325,543 mo le Fuataga o le Tua'oi o Ātua ma isi e tusa ma fa'amasinoga o lo'o fa'atinoina i luga o fanua ma suafa;
- \$2,000,000 mo le fausiaina o le Fale Fa'amasino fou i Savaii;
- \$350,000 mo le fa'aleleia o ea malulu mo le ofisa fa'atasi ai ma potu o lo'o fa'afoeina ai fa'amasinoga;
- \$100,000 mo Fa'amasino o Talosaga toe iloilo-soligatulafono ma aitalafu;

16. Matagaluega o Puna'oa Fa'alenua ma le Siosiomaga - \$25,867,242

- \$13,096,792 mo Galuega Fa'atino a le Matagaluega;
- □ \$12,770,450 auā Galuega e Avea ai ma Sui o le Malo.

Faiga Fa'avae Tetele o lo'o i Galuega Avea ai ma Sui o le Malo

- \$4,221,355 mo konekarate o lo'o fa'atinoina auaunaga mo le fa'amamāina o le taulaga ma le aoina o lapisisi;
- \$2,000,000 mo le tau'i o fanua aua fa'asao a le Malo;
- \$164,100 mo le fa'amamāina ma le va'aia lelei o fa'atānoa o lo'o lafoa'i ai otaota lē tā'ua;
- \$1,000,000 auā se polokalame fa'apitoa mo le toe totōina o vaomatu o le atunu'u;
- \$205,000 mo auaunaga o le Komiti Faufautua mo le fa'aaogaina o Fanua Fa'aleaganu'u;
- \$245,000 mo konekarate e fa'amamā ma moaina le vao i nisi o fanua fa'asao a le Malo;
- \$388,300 mo konekarate mo le fa'amamāina o fale lē ta'ua;
- \$100,000 mo le lisi o le Ofisa Tutotonu o le Asosi o le Pasefika mo Suavai ma Suavai Lafoa'i;
- \$160,000 auā auaunaga tau Tomai Fa'apitoa/Konesale mo le vaega o suavai ma suavai lafoa'i;
- \$150,000 mo le polokalame mo le tapu'eina o le suavai mai i le timu (Tane Vai);
- \$400,000 Tau'i o Fanua auā le fa'asaoina o puna'oa o le suavai;
- \$200,000 mo le fa'amamāina ma isi auaunaga o lo'o fa'aaogaina i le malae fa'apa'aga po'o le Friendship Park i le ele'ele fou;
- \$500,000 auā auala mo fanua lisi a le Komiti Fa'atonu o Fanua totogi lisi;

17. Matagaluega o Leoleo ma Falepuipui - \$37,765,534

- \$34,314,488 mo Galuega Fa'atino a le Matagaluega;
- \$3,451,046 auā Galuega e Avea ai ma Sui o le Malo;

Faiga Fa'avae Tetele o lo'o i Galuega Avea ai ma Sui o le Malo

- \$160,000 mo alii ma tamaitai malu o le malo o lo'o auina atu i vaega mo le tausiga o le filemu i atunu'u i fafo;
- \$900,000 mo toniga a leoleo;
- \$300,000 mo laisene ma isi tulaga mo'omia mo auaunaga tau ta'avale afi;
- \$450,000 mo taumafataga a pagotā;
- \$150,000 toniga ma meafaigaluega mo'omia auā le malu puipuia o leoleo i le falepuipui;

- \$102,200 mo le polokalame o le fa'amamāina o le taulaga lea o lo'o fa'atinoina e nisi o pagotā;
- \$100,000 e tofogi ai le foma'i mo pagotā;
- \$100,000 mo konekarate moavao o lo'o fa'atinoina nei auaunaga i le ofisa tutotonu ma isi ofisa o leoleo i tua i nu'u;

18. Pulega o Galuega Tineimu ma Fa'alavelave Tutupu Fa'afuasei i Samoa - \$10,613,030

- \$10,073,628 mo Galuega Fa'atino a le Pulega;
- \$539,402 auā Galuega e Avea ai ma Sui o le Malo;

Faiga Fa'avae Tetele o lo'o i Galuega Avea ai ma Sui o le Malo

- \$200,000 mo toniga o alii ma tamaitai o lo'o fa'atinoina auaunaga lavea'i a le Pulega.

19. Matagaluega a le Palemia - \$10,145,941

- \$7,631,791 mo Galuega Fa'atino a le Matagaluega;
- \$2,514,150 auā Galuega e Avea ai ma Sui o le Malo;

Faiga Fa'avae Tetele o lo'o i Galuega Avea ai ma Sui o le Malo

- \$261,223 mo le Polokame Tau Femalagaa'iga o lo'o fa'aaogaina auā auaunaga a le Matagaluega;
- \$710,000 mo le fa'atauina mai o tusifolau;
- \$150,000 e fesoasoani atu ai i le Fa'alapotopotoga Tausi mo Tagata ua Fa'afo'i mai i Samoa mai isi atunu'u;

20. Matagaluega o Tiute ma Tupe Maua - \$13,431,913

- \$10,718,805 mo Galuega Fa'atino a le Matagaluega;
- \$2,713,109 auā Galuega e Avea ai ma Sui o le Malo.

Faiga Fa'avae Tetele o lo'o i Galuega Avea ai ma Sui o le Malo

- \$250,000 auā le saofaga a le Malo i le Fa'alapotopotoga Fa'amalosia le ASYCUDA o se polokalame o lo'o fa'aaogaina e mataituina ai oloa auina mai fafo auā le fa'amauina o tiute;
- \$681,155 konekarate ma le Data Tech International mo le polokalame o lo'o fa'atinoina ai le mataituina o lafoga tofogi i luga o oloa ma auaunaga (TIMS);
- \$125,000 mo auaunaga auā le si'itia o le malu puipuia o tatou tua'oi fa'ava-o-malo;
- \$184,920 vaegatupe mo le polokalame o lo'o fa'aaogaina auā le mafai ona fefa'asoa'i o fa'amaumauga tau lafoga;

21. Matagaluega o Tina ma Tamaitai, Atinae o Nuū, Afioga ma Agafesootai - \$24,984,980

- \$10,482,547 mo Galuega Fa'atino a le Matagaluega;
- \$14,502,433 auā Galuega e Avea ai ma Sui o le Malo;

Faiga Fa'avae Tetele o lo'o i Galuega Avea ai ma Sui o le Malo

- \$400,000 mo le Fuataga o le Ie Samoa lea e fa'atinoina i tausaga taitasi;
- \$100,000 e fesoasoani ai i le Asosi mo Vai Tuma'oti;
- \$150,000 mo Polokalame auā le fa'amatagofieina o Nu'u ma Alalafaga;
- \$2,100,000 e fesoasoani ai i galuega ma polokalame fa'atino a Komiti Tumama i nu'u uma;
- \$250,000 e si'itia ai le tomai ma auaunaga mo nisi o Fa'alapotopotoga tuma'oti e pei o talavou, tina ma ekalesia ina ia mafai ai ona latou ta'imua i le fa'atinoina o atina'e a le Malo;
- \$11,000,000 e amatalia ai le fesoasoani tu'u sa'o i itumalo auā le fa'atinoina o atina'e e tusa ai ma ta'iala ma fuafuaga fa'ata'atitia e tapenaina fa'atasi ma le Malo;

22. Matagaluega o Galuega, Felauaiga ma Atinae Eese - \$21,368,325

- \$5,201,841 mo Galuega Fa'atino a Matagaluega;
- \$926,845 auā Galuega e Avea ai ma Sui o le Malo;

Faiga Fa'avae Tetele o lo'o i Galuega Avea ai ma Sui o le Malo

- \$250,000 auā se iloiloga mo le si'itia o tulaga o lo'o iai nei uafu ma gafatifale i Manono ma Apolima;

23. Pulega o Fela'ua'iga i le Lauelele - \$46,912,488

- \$38,409,880 mo Galuega Fa'atino a le Pulega;
- \$8,502,608 auā Galuega e Avea ai ma Sui o le Malo;

Faiga Fa'avae Tetele o lo'o i Galuega Avea ai ma Sui o le Malo

- \$3,000,000 e fa'alelei ai le auala ma alavai i Fugalei;

24. Ofisa o le Loia Sili - \$5,367,508

- \$4,653,527 mo Galuega Fa'atino a le Ofisa;
- \$713,981 auā Galuega e Avea ai ma Sui o le Malo,

25. Ofisa o le Pule ma le Suetusi Sili - \$4,107,581

- \$3,421,011 mo Galuega Fa'atino a le Ofisa;
- Galuega Fa'atino Tuuina atu i isi Vaega
 - \$100,000 mo tapenaga auā le fa'atuina o le Pulega o Amiotonu (Anti Corruption Authority);
- \$586,570 auā Galuega e Avea ai ma Sui o le Malo;

26. Ofisa o le Komesina o Faiga Palota - \$3,192,962

- \$2,609,216 mo Galuega Fa'atino a Ofisa;
- \$583,747 auā Galuega e Avea ai ma Sui o le Malo.

Faiga Fa'avae Tetele o lo'o i Galuega Avea ai ma Sui o le Malo

- \$200,000 mo se Komisi Fa'apitoa e Suesueina tulaga tau Faiga Palota;

27. Ofisa o le Fono Aoaio Faitulafono - \$7,333,917

- \$5,822,906 mo Galuega Fa'atino a le Ofisa;
- \$1,511,011 auā Galuega e Avea ai ma Sui o le Malo;

Faiga Fa'avae Tetele o lo'o i Galuega e Avea ai ma Sui o le Malo

- \$250,000 mo le toe iloiloina o le Fa'avae o le Malo Tutoatasi o Samoa;
- \$200,000 mo Vaega Faaupufai;
- \$175,000 mo le Polokalame Fa'a-Palemene fa'apitoa auā a'oa'oga ma sootaga ma tagata lautele;
- \$170,000 mo Polokalame Fa'alea'oa'oga Fa'apitoa mo Sui Usufono.

28. Komesina o Sulufaiga - \$1,483,635

- \$1,216,466 mo Galuega Fa'atino a le Ofisa;
- \$222,169 auā Galuega e Avea ai ma Sui o le Malo.

29. Komisi o Tagata Faigaluega a le Malo - \$8,525,285

- \$4,464,907 mo Galuega Fa'atino a le Komisi;
- \$4,060,379 auā Galuega e Avea ai ma Sui o le Malo.

Faiga Fa'avae Tetele o lo'o i Galuega Avea ai ma Sui o le Malo

- \$277,579 mo le Komiti e Iloiloina Totogi o Tagata Faigaluega;

- \$165,376 mo le totogiina o le laisene mo le Polokalame fa'apitua mo Fa'amaumauga tau tagata faigaluega;
- \$3,200,000 Polokalame o Sikolasipi a le Malo;

30. Ofisa o Fuainumera Fa'amauina - \$6,064,345

- \$4,328,462 mo Galuega Fa'atino a le Ofisa;
- \$1,735,883 auā Galuega e Avea ai ma Sui o le Malo;

Faiga Fa'avae Tetele o lo'o i Galuega Avea ai ma Sui o le Malo

- \$1,000,000 mo le Tusigaigoa o le Faitauaofa'i o Tagatanu'u.

31. Komisi ole Toe Fuataiga o Tulafono - \$1,499,474

- \$1,239,506 mo Galuega Fa'atino a le Komisi;
- \$259,968 auā Galuega e Avea ai ma Sui o le Malo;

32. Matagaluega mo Fa'alapotopotoga a le Malo - \$3,158,808

- \$2,536,639 mo Galuega Fa'atino a le Matagaluega;
- \$622,169 auā Galuega e Avea ai ma Sui o le Malo.

VII. TUPE LE FUAFUAINA

O le aofa'iga o Tupe Le Fuafuaina mo le tausaga 2021/22 e tusa ma le \$21 miliona talā e fua i le aotelega o polokalame mo tupe fa'aalu a Matagaluega o le Malo.

VIII. O ISI ATINA'E (FA'ATUPE MAI FESOASOANI FA'AMEALOFA MA NONOGATUPE MAMA TULUI)

Lau Afioga i le Fofoga Fetalai,

O lo'o maitauina lava le fa'atupulaia o le lagolago mai a tatou pa'aga masani e ala i poloketi o lo'o fa'atupe ai atina'e ma polokalame mo le tausaga faaletupe 2021/22. O le aofai o fesoasoani o lo'o fuafua e fa'atupeina i fesoasoani ma nonogatupe e mama tului o lo'o fuafuaina e oo atu i le \$243.4 miliona tala. E \$241.2 miliona tala o lo'o fuafuaina e fa'atupe i fesoasoani po'o grants – o vaega nei o lo'o fuafua e fa'aaluina ai - Vaega o Tupe (\$81.3m) Vaega o Femalagaiga, Atinae ma Galuega Tetele (\$62 m), Vaega o Fa'atoaga (\$23.8 m), Vaega o Soifua Maloloina (\$19.45 m), Vaega o Siosiomaga (\$18.6 m), Vaega o Aoaoga (\$11.95 m), Vaega e A'afia ai Isi Vaega (\$9 m), Vaega o Feso'otaiga (\$5.2 m), Vaega o Nuu, Afioaga, Atinae ma Fa'alapotopotoga Fesoasoani (\$4.8 m), Vaega o Fa'amasinoga (\$1.97 m) ma le Vaega o Turisi (\$1.0 m). O lo'o fuafua foi le vaegatupe e \$2.19 m mo le Vaega o Malosiaga.

O lo'o fuafua e pa'u fesoasoani tu'uina mai i paaga ile 6% mo le tausaga faaletupe 2021/22 ona o le si'itia o fesoasoani tapenapena mo le Koviti-19 sa tu'uina mai ile tausaga ua mavae. I le tulaga tau nonogatupe, o lo'o fuafua e pa'u ile 81% ile tausaga 2021/22 pe a fa'atusa ile 2020/21, o le amataga lenei o fuafuaga a le faigamalo e pei ona taua muamua ina ia tu'uitiitia tatou nonogatupe.

IX. TALA OLE TUPE E FA'AAUAU AI AUAUNAGA A LE MALO MO LE TOLU (3) MASINA (1 IULAI – 30 SETEMA 2021)

Lau Afioga i le Fofoga Fetalai,

O lo'o tu'ufa'atasia i lenei Tala ole Tupe 2021/22 le Tala ole Tupe mo le fa'aaauaina o auaunaga a le Malo i le tolu masina (1 Iulai – 30 Setema 2021) a o talia le pasia aloaia ole Tala Fa'atatau Autu ole Tupe 2021/22. Sa fa'amaonia e le Malo talu ai le fa'aaogaina o Vaega 105, 106 ma le 93 o le Fa'avae o le Malo Tutoatasi o Samoa e totogi ai auaunaga manaomia a le Malo a o talia le pasiaina ole Tala Autu ole Tupe e le Palemene.

O le Vaega 95 o le Fa'avae o Samoa sa tatau ona fa'aaogaina ae peitai ane ua fa'aaau pea le fa'aaogaina o le Vaega 105, 106 ma le 93 o le Fa'avae ia aua nei i ai se to'a i le totogiina o auaunaga manaomia a le Malo.

O lenei Tala ole Tupe o lo'o aofia ai le Tala ole Tupe mo le tolu (3) masina (1 Iulai – 30 Setema 2021) fa'atasi ai ma tupe totogina atu e fa'aaoga ai le fa'amaoniga a Le Ao Mamalu o le Malo.

X. UPU FA'AI'U

Lau Afioga i le Fofoga Fetalai,

O lenei Tala o le Tupe FY2021/2022 o le uluai Tala o le Tupe a le Faigamalo a le Fa'atuatua i le Atua Samoa ua Tasi (FAST), e ui lava ina faigata ma fita le auala sa uia ona o le tu'ufa'atasia o lenei Tala o le Tupe ae e i ai le talitonuga o le galuega sa fa'atinoina so'oso'o tau'au ma Matagaluega ma Ofisa uma a le Malo ma o lo'o fa'amausalina ai le naunauta'iga ina ia fautele le sa'o Samoa auā le tatou folauga mo le Paea'iga XVII lenei o le Palemene o Samoa.

E ui i le tele o lu'itau o lo'o feagai ai si o tatou atunu'u, o lo'o atagia mai i lenei Tala Autu o le Tupe se malama a taeao, e le gata i le toe poupu o le tamaoaiga, atia'e ma fa'asoa tatau le tamaoaiga mo le si'itia o le soifua manuia o tagata uma o Samoa ae o se amataga fou foi lea i le tala fa'asolopito o Samoa ma lona Palemene, e avea ai lo'u nei tagata fa'atauva'a e fai ma Sui o le Palemia Tamaitai muamua o Samoa ma le mamalu o le Faigamalo,

le tu'uina atu o lenei Tala Fa'atatau Autu ole Tupe FY2021/2022 mo le lauliliuina e le Palemene o Samoa.

Soifua ma ia Manuia.

Na faaalua le agaga fiafia o le Maota i le patipati o latou aao i le maea ai o le Saunoaga a le Minisita o Tupe.

FOFOGA FETALAI: Faafetai i lau Afioga i le Minisita o Tupe mo le Lauga o le tatou Tala o le Tupe.

LAFO MO LE FAATAATIAESE O TULAFONO TUMAU

FOFOGA FETALAI: Ou te tapa lau Afioga i le Tamaitai Palemia mo le lafo.

Afioga Hon FIAME NAOMI MATAAFA: Lau Afioga i le Fofoga Fetalai, ua faafofoga le Maota ma le tapuaiga mamalu a Samoa i ona tulaga faalupe i le tulaga ua i ai nei tualumaga a le Palemene i lenei taeao. O le a le toe afea foi se tautalaga aua ua maea ona faamanino ia tulaga uma i lau Lauga Faa-Minisita ae sa faapea foi ona taua i lau Saunoaga Mua i lenei taeao.

O le agaga ia te au ma le Malo ua fia faagasolo le faatinoga o matafaioi a le Malo na filifilia mai ai e le atunuu e ala i lenei Tala o le Tupe mo galuega ua fia faatino. Ua silafia manino foi e lenei Maota faapea le tapuaiga a Samoa, o le faaiuga o le masina lenei e maea ai le Tala o le Tupe o lo o faagasolo nei.

Ona o lea, ou te faatuina ai le lafo, *Ina ia faataatiaese le Vaega o le Tulafono Tumau 133 o lo o aiaia ai le tuuina atu o le Tala o le Tupe i le Komiti o Tupe Maua ma Tupe Totogi mo le iloiloia, ina ia avanoa ai loa le faagasolo o felafolafoaiga i luga o le faitauga faalua o le Tala o le Tupe ua faataatia nei i le Laulau-a-Fono ma faaauau ai i lona iloiloga auiliili ma lona faitauga faatolu.*

Faaluaina e le Sui Palemia, Minisita mo Faatoaga, Minisita mo Galuega, Felauaiga ma Atinae Eseeese ma le Minisita mo Pisinisi Alamanuia ma Leipa.

Na faamaonia le lafo ma tulai ai le Tulafono Tumau 133 ua faataatiaese.

TULAFONO TAU FAAOFI O LE FAATATAUINA O TUPE 2021/2022 – felafolafoaiga i luga o le faitauga faalua

FOFOGA FETALAI: E tusa ai ma Tulafono Tumau 133, o le a faaauau felafolafoaiga i le Tulafono Tau Faaofi o le Faatatauina o Tupe 2021/2022.

Mo le silafia e sui usufono mamalu, e tatau ona saunoa sa’o lava i tulaga tau tupe ma le tamaoaiga o Samoa faapea faiga faavae tau tupe a le Malo.

Ia, e i ai fautuaga i tatou sui usufono mamalu, atonu o le avanoa lenei e tuuina atu ai i tatou sui usufono aua tatou lauga i le Tala o le Tupe. Ia o fautuaga lava, aua ne i tatou lauga i mea taitasi ae ia tatou lauga faalauaitele aemaise faiga faavae tau tupe a le tatou Malo.

Ia, o le avanoa lenei mo se sui usufono. Tulai mai lau Afioga i le Sui Fofoga Fetalai, o le sui usufono mamalu mai Aiga i le Tai.

SAUNOAGA FAA-TAUPOU

Afioga AUUPAAU MULIPOLA ALOITAFUA (Sui Fofoga Fetalai, Aiga i le Tai): Na ou matua faatalitali lava i le Alii ua la faafofoga foi i la’u alaga, na Ia toina au ai le lua a malaia ai, ma le mea e matua palapala. Ua faatuina ou vae i le papa ma ua faamautuina lou savali, ua fusia lou tagitui i le siva, ua e saeia lou ie talatala ae fusia au i le fiafia. Ua sauva au i fotu o ulufau o lenei aso, faafetai atu i lau Afioga i le Fofoga Fetalai mo lou avanoa.

E muamua ona ou faatulou i le paia o le Maota, e moni lava upu o le gataifale, e pau a le vasa o ona gafa. E faatalofa atu i lau Afioga i le Palemia filifilia o Samoa, a o se Tamaitai Palemia filifilia muamua lea o le Pasefika, lau Afioga i le Sao Faapito aua le Aiga Salevalasi ma le vaa taumualasi, se e lafalafa lava tuna, o lau Afioga i le Tuiatua.

E faatalofa atu i le Sui Palemia, lau Afioga i le Sao Alii. E faatalofa atu i Afioga i alii ma tamaitai Minisita o le Kapeneta filifilia. Ae a sautualua o Afioga i Minisita Lagolago o le faigamalo ua faauuina. E faafetai i le Atua o lea ua tatou laumua fesilafai, o le Atua o Sapaota, o le Atua o Iakopo, o le Atua o le Palemene ua potopoto. Viia le Atua i Lona alofa ma Lona agalelei. E moni lava e faavavau le viiga o le Atua. E a le tu, e a le tu.

E faatalofa atu foi i le aufaigaluega tofofi a le Atua i so o se fatafaitaulaga, o lo o faanonomanu ai aua le utugataufa i le Atua ma lona finagalo, faamalo faafetai i la outou galuega faifaipea, aua se to’a o Samoa ma agai i luma.

E faapai atu foi i Ofisa Sili o Pulega o Matagaluega ma Faalapotopotoga Tumaoti a le Malo ua tatou faatasi, le aufaipisinisi, aemaise le lautele o le atunuu ua tatou faatasi ai.

E faatalofa atu i Le Ao Mamalu o le Malo, e ui ina o tatou le faatasi ma lau Masiofo, lau Afioga Tuiaana Tuimaleaalifano Sualauvi II. E faatalofa atu i le Sui o le Fono a Sui Tofia ma lou faletua. E faatalofa atu i le Faamasino Sili ma le Matagaluega e faafoefoaina tulaga tau faamasinoga a lo tatou Malo, malo faafetai.

E faatalofa atu foi, e le vaea le falaooto i o tatou uso i Amerika Samoa ma le faigamalo, lau Afioga i le Kovana Sili, le Lutena Kovana ma sui usufono uma o Maota e lua. O le paia lava lea aua le afio o Maopu, Sua ma le Vaifanua, Ituau ma Alataua, Saole ma Saleaaumua ma le Launiu na Saelua. Ae a le paia i le Motusa, i le mamalu o le Faleula, Tootoo o le Faleula, le Faleula tauaitu ma le Faleula tau tagata, Faatuiolemotu ma le Tama a le Manuatele.

E tau ia ina ou piipa ma solisoli faavasaga le mamalu o Samoa ua le paau mai i le Maota nei. Ua mavaevae papa, a o papa foi sa foa e outou tuua ma matua, ua tofafa mai tiasa ae momoe i malae. O le upu moni ua gagana utuloga aua le utaga o manu i lenei aso. A o ni manu foi aua Tama ma o latou Aiga, o Aiga ma a latou Tama. O ni manu foi aua Aiga o Nofo, Aiga o Papa, Aiga na Tafai, Tafaitia, Tafaitoto, e Tafai foi i fetalai. Ae tau ia ina ou saua i le va, aua o faiva e auilima le tautala ma le faugagana.

O Samoa o le atunuu e faigata, aua e saoo faafeofe le gataifale ou paia ma ou mamalu e le gafataulimaina e se isi. O lea ua tatou faatasi ona o le silafaga ati a le Atua i lenei aso, ua paia ma mamalu aua le atululuga ma le atusasa. O lea ua tatou futifutu manuula ae ua tatou talatalafulu le ana. Ua tatala e le Atua vaiola ae pupuni vaioli le Alii e, ua tatou utuvai magalo foi i seeti, ae ua saasaa foi manuuli i puoo, ona o le alofa ma le agalelei o le Atua. Ua faautuutu le salefu, ua lefulefu sigano foi paia o le Maota lenei. O le Maota ua mafatotoga, o Tiafau o le malae o le faautugatagi, o le malae o le tagatia a le atunuu ma le taga mamanu o lenei aso.

Ou te le toliniu fitifiti la pe ou te fia tia tamusa, ae na o le fiafia i le Atua aua o lea ua momoe mata o matamatagi, ua taoto foi peau ulavavale o le sami i lenei aso, ua sosola foi ao na i Gagae. Tulou le Maota, e le fagatua manu o le gogosina, manu o le tuasivi ma lou gogouli. Faafetai o lea ua tuta i taga le sa folau o le Aiga Sa Tunumafono, a ua fanaafi o malama ina ua olioli faatasi fetu o le taeao i lenei aso. Ua lulu fulufufiso foi le agaga ona o le Atua ma lona finagalo, o le mataisau o le foafoaga. Ua alalaga faatasi fetu o le taeao, o lea ua tatou feiloai i mauga o ao, ae ua le o liulaumea i lenei aso. Ma ua laga foi manu talimalama, a ua sola le nuu tutai, ona o Lona alofa ma Lona agalelei. Le Alii e, faamalo alofa, ua felele gogosina i lenei aso, ua seu foi i le pepesina ona o Lona alofa ma Lona agalelei.

Ia mapu ane ia i papa le gae ma le fala le see le paia o le Maota nei. Ae tau lava ina sei ou afe ane lau Afioga i le Fofoga Fetalai, se i fai se tala i lenei itumalo o Aiga i le Tai.

Aiga i le Tai e, e le galo oe, e le galo oe i lau faiga filifiliga. Ua maea ma tuanai asuasuvale, o lea ua tatou feiloai i le maninoa i lenei aso. O lau pule lea. O oe le susuga tutasi o le Aiga Sa Malietoa. Susu lau Susuga Taupau aua le faaaloaloga ia Tina, ma le tou aiga Sa Taupau. Susu lau Susuga i le faaaloaloga a le Aiga Sa Mulipola i Falemai ma ona itupaepae mavae e fia aua le suafa. Susu lau Susuga i le Luatutu o le Tapunuu i Anaolemaile. Lau

Fetalaiga Auapaau o oe o le moa na sei e vini mua ia Samoa e faailoa ai o oe o le tagata e toa. Mamalu mai oe le falefa o Salua. Susu lau Susuga Tuilaepa o oe o le Alo o le Malietoa e te faasaosao i Fogamanono. Usoalii, maliu mai oe le Matua ia Finau ma le pologa ua mama.

Talofa lau Susuga Leiataualesa, e te faasaosao i Luatimu, o oe o le uluaipouomalo. Alaalatai oe le Aiga Sa Mutimuti ma le matua ia Vaisagote, ae malulalotao a ia paia ma mamalu ia te oe Futi o lou uso tuofe, e le o se uso taufeagai. O taua o le taulima auro o le taeao nai Faleu ma Utuagiagi. Talofa Leiataualetaua, o lo o e susu i Malaetuli, alaalatai oe le Matuaovai, Falelimaoalosapapa ma le faletolu, ma le mamalu ni muliauma eseese ia te oe le Falemanono, susuga tutasi, aua le Aiga Sa Malietoa.

Susu Sa'u ma le aiga sa Saū, alaalatai le fetalaiga ia te oe le Sāuma, o mamalu ia aua lou nuu i Apolima.

E le faagaloina foi le afioaga aua le usoalii ma alo o le Malietoa, Fualefau ma le Pouli, Ati ma Lautolo, ma lau afioga i le Tapaau. Ou te le alo foi i le pati fataloto, nei le atoa tupe i le taulafoga ma le atoa pulu fagota o lou vaa.

I le paia aua le Aloalii, Letelemaaana o oe o le tamaitai tasi o Aana, le matua taulagi, alaalatai oe Peipeigamalie ma le tou Toafa, le lautinalaulelei ia te oe Satuimalufilufi ma le nofo a ituaiga.

O paia ia ma mamalu o lou itumalo ma paia faale-aganuu aemaise o lou itumalo faapalota. Ua faamalo le taupati, o le upu moni, ua outou faatu au nai le lua taaligoligoa. Sa ou asaina foi le matautia o le faiga tofa i lo tatou nuu, aepeitai, o lea ua tau lau o le faamoemoe i lenei aso. Se ua utumanava loimata o le fiafia, aua o lea ua ae le suagaipo nai Avalua i lau faatofalaiga. Ua taoto foi le aupeau, aua o lea ua tatou tini togotogo. Sa ou manatu lava i le tofa sasaa mai, aua sou sao i upufai o Malo, malo faafetai.

E fia momoli le faafetai i tamalii sa matou sueina le Nofoa o lo tatou itumalo. Faamalo taupati, lau Susuga Leiataualesa, lau Susuga Mulipola, lau Susuga Ifopo ma lau Susuga Pouli. E faamalulu atu, e pei lava ona ou fai atu, ua oo lava i le taimi o le moa na vinimua. Sa ou tatalo foi aua ua soo le taiao i lo tatou itumalo, ua mua foi lena tausaga, o manu na faausu ae se i tali au le manu tupapa.

Ua oo foi i nisi tootooau o lo tatou itumalo e pei o fetalaiga ia Levaa ma Vaatiuola, o Mafua ma nisi. Ae a le taimi nei, e le o le taimi ea lenei o taua Futi ma Auapaau. Malo faafetai o la outou pule lea, e faigata e sailigata le ia o le ao o Salafai. O la outou faatofalaiga foi, se ua tofua i puna ae ae i Nagaua. O le upu moni lou itumalo, sa ou asiasi i lagi, sa ou asiasi foi i salefee, o lea ua to ai manu mo lou nei tagata. E ta tagata Leatiogie, ae patipati taoto le Feepo. E manatu foi, o lea ua io le upega fagota i upufai o Malo. Ua taioo foi le masina atoa, ua ou taina lau tia, ua e suniina, faamalo faafetai.

Ona ou oo ane lea i le Tala o le Tupe lau Susuga i le Fofoga Fetalaiga, faamalo faafetai i lenei Tala o le Tupe lau Susuga Mulipola, le Minisita o Tupe, le faasoasoina o le tupe aua le tamaoiaiga o lo tatou nuu. E tele ni vaega ou te

fia oo i ai, e pau lava lea, o le a tau tonu ma vili tonu le ifi a Maina. E faafetai i lau Afioga i le Minisita e tusa ai o le faavasegaina o se seleni mo lenei itumalo. E pei lava ona silafia e le Maota, e pau lava lenei o le itumalo e tolu (3) lava motu. O le siusiu po o le tafa lea i Saute o Upolu nei, o le motu i Manono ma le motu i Apolima. E masalo e leai lava se sui usufono o le Maota lenei e laasia le vasa pe a asiasi i motu nei e tolu (3), seivagana sui mai Salafai.

Ae faafetai i lau Afioga i le Minisita, e manatu o le Vaega 22 ua faataoto se seleni e kuata miliona mo uafu nei i Manono ma Apolima. Ua faamalo faafetai Mulipola ua e alofa mai ia te au. Faafetai i le Faigamalo, e ui ua tuanai atu lena masina sa tatala ai le galuega tele i lou uafu, malo faafetai. O lea la ou te tilotilo ma le totoa i le Tala o le Tupe o lo o i lalo o le Matagaluega o Galuega Tetele. Lau Afioga i le Minisita, faafetai i lea vaegatupe. E pau lava lau tatalo, fai loa, aua le toe tuu tuai ia, faataunuu loa. Aua lava ne i toe faatali.

Ona ou oo mai lea i le isi vaega lea i le puipuiga o le siosiomaga aua lenei vaitaimi o le natura ia ma le tele o le faaletonu o le suiga o le tau. O lea e aafia ai foi taimi e oo mai ai mala faalenatura, ia ou te tatalo atu i lau Afioga i le Minisita, pe afai o i ai i i vaega sa o tatou taua savali faamalamalama, o ni auala savali foi lea mo lou motu lea o Manono ma Apolima. Ne i tua mai pe i ai ni pefea i mala faalenatura, a o i ai se mea e sulufai i ai ou motu nei e lua ma lau faatofalaiga. Afai e le lava le \$250 lea toe tuu atu i ai ma se isi. O le talosaga lea a lenei itumalo.

Ia ona ou oo mai lea i le vaega lea o Faamasinoga. E le po malae i lau Afioga i le Fofoga Fetalai, i lenei vaitaimi i le tulai mai o le fesopoai o le malosi o le tulafono, Tulafono o lo o faafoefoe ai afioaga, ia aemaise lava Tulafono tau Faamasinoga. E le natia, masalo a ou tilotilo i ai i lenei vaitaimi, e pei foi lea o se mea na faafofoli lava e tupu, ae na ona pasi lava o Tulafono, Tulafono ia na pasia i le tausaga lea na tea nei i lea nofoaiga, mapuna mai loa ma aafiaga lea ua ou vaai i ai. Faamolemole e tatalo atu i lau Afioga i le Minisita o Faamasinoga, ia se i toe tagai ane po o le a se auala e mafai ai ona faatoafimalie. Ne i sopoutu le isi malosi i le isi malosi, ia ae faapena ona ou tatalo atu i lau Afioga i le Minisita.

Ia faafetai i lau Afioga i le Minisita o le Soifua Maloloina, manatu o lea ua faasolo tuiga i lenei vaitau. Ia tautuana ane lau Afioga i le Minisita, pei e faigofie lava le afio atu o lau aufaigaluega i ou motu ia e lua, ia e maua ai foi le faamamaavega ia te oe i le feoai o fomai.

Ia e pei o nai tulaga ia ou te talosaga atu i ai, ae o le taatia mai o le Tala o le Tupe ma ona vaega uma ma le faasoasoa, ia faamalo faafetai i lau Afioga i le Minisita. Faamalo le pale ma le folau i le faatinoina e le faigofie le galuega.

Ia na ona faufautua atu lava, i a outou Afioga i Minisita, ia o lea faatoa faatu le tatou faigamalo. Ia e maua lava ai i le faataavalevale, ia e maua foi ai i le tea masau.

Ia ona faaiu lea o au upu, le mamalu e o Samoa ua aofia, e le natia ia le tulaga ua oo i ai ia le tatou faigamalo ma upufai, i le le atoa ai o tino o Vaatausili i lenei vaitau. Ou te tatalo ou te le ulutoina le tofa i aiga, aemaise le faautaga oooo, i faleupolu i la outou faafaleupoluga. Samoa, omaia tatou aeae lea manu ua ulu. Ua see le tatou sa folau, o le Palemene na filifilia mai e le Atua i le lagi. Ia o tatou alofagia, omai tatou galulue faatasi, e le mo matou, ae o le atunuu ma lo latou valaauina.

Ia ona ou faapea atu lea, alofagia e le Atua Samoa, aua ne i ufemeleai le tofa i aiga, pe ulumea fatufala foi le faautautaga i faleupolu. Aua ne i faausautia i malae le soifua o tatou aiga, aemaise le atunuu. Alofagia le aufaigaluega tofofi a le Atua, e le gata o fata faitaulaga i Samoa nei, a o atunuu mamao o lo o togi mai la outou maa i le tamaoiga o Samoa. Ia alofagia lo outou soifua galulue.

Ia ona faaiu lea o au upu, lau Afioga i le Palemia, e umi le ala. Le aiga Minisita, faamanuia i la outou galuega fita. Sautualua i Minisita Lagolago o le Kapeneta, ia maua pea lo outou lagolagosua. Ia lau Afioga i le Fofoga Fetalai, o lea o le a faauma atu, alofagia Tupu ma Tamalii o le tatou atunuu, faletua ma tausii, o outou lava o foetauta lagolagosua pe a faaletonu foepule, ia o le pulega lea a alii ma faipule. Maua lou soifua laulelei lau Afioga i le Fofoga Fetalai o le Maota. A alualu suaga o le vaatele ua le lava lou soifua maloloina ona e mafua mai o upufai a Malo, ia avatu i ai ma lou fatu e ta te nonofo faatasi i luga i ina, ina ia maua ai lou toa.

Ia ua faaiu au upu, alofagia le Paeaiuga ua o tatou amataina nei, lo tatou sa folau Samoa, ia o tatou aleaga piioga ae le o le tatou aleaga piiama. Ne i mea ane mamaioa, mamaitaloa.

Le Atua e, ia e faatumauina le la i luga o Kipeona, ma le masina i luga o vanu o Ainona, e faapena ou moomooga mo oe Samoa. Soifua.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Aiga i le Tai.

FOFOGA FETALAI: Faafetai, ua faamalo le saunoa i lau Afioga i le Sui Fofoga Fetalai po o le sui usufono mamalu foi mai i le Aiga i le Tai. E talitonu foi ua faafofoga faavaotutui foi lo tatou Maota nei, ia aemaise foi le faafofogaaga a le itumalo, ia ae faapea foi le atunuu.

O le mea lea faafetai tapena, faafetai lototele. O le mea sili lava, o lea ua oooo lava au saunoaga aua le tatou Tala o le Tupe ia aemaise foi nai atinae o le itumalo. O le mea lea malo faafetai. E talitonu lava ua faafofoga mai le itumalo ma le atunuu, o lea lava ua tau i manu le lauga o lenei aso, malo faafetai.

Ia o lea lava e lava le tatou taimi. E talitonu lava e i ai se sui usufono toatasi e... ia e le o toe mamao le tatou taimi. Ia ou te talitonu o lea ua lava ma totoo se tasi o sui usufono e saunoa.

Ia o le avanoa lenei mo se isi sui usufono ma le agaga faaaloalo. Tulai mai le sui usufono mo Faleata Nu.1, ia tau ina amata ona faauma lea i le aso a taeao.

SAUNOAGA FAA-TAUPOU

Afioga MANULELEUA PALETASALA T TOVALE (Faleata Nu.1.): Faafetai i lau Afioga i le Fofoga Fetalai mo se avanoa ua maua e lenei itumalo o Faleata Nu.1. O lea ua mapu i le vaosa o aliiseu le taseuga nai tuavao, ae faaifoifo i tialologo lupe o le vaofilifili aua le faalelegafulu, ausee i tafala ua mafua ai ona tatou fesilafai i lenei taeao matagofie. O lea ua faatauata nei le la ma le masina, ua toa i faga laua aua o lea ua faalepa le vaatui ae folau loa le vaatele.

Ae avea ia lenei avanoa matagofie ou te faatalofa atu ai ma faafeiloai atu i le Maota o Samoa. Ou te faatalofa atu i lau Afioga i le Tamaitai Palemia, lau Afioga Fiame Naomi Mataafa. Ou te faatalofa atu foi i lau Afioga i le Fofoga Fetalai ma le Sui Fofoga Fetalai. Ou te faatalofa atu foi i Afioga i Minisita o le Palemene. Ou te faatalofa atu foi i sui usufono uma ua aofaga potopoto i lenei taeao.

Ou te faatalofa atu foi i lau Afioga i Le Ao Mamalu o le Malo, lau Afioga Tuimalealiifano Sualauvi II ma lou Faletua, aemaise ou te faatalofa i Sui o le Fono o Sui Tofia o le Maota.

Ou te faatalofa atu foi i le Afioga i le Faamasino Sili, alii ma tamaitai Faamasino o le Faamasinoga Mauuluga. Ou te faatalofa atu foi i Ofisa Sili o Pulega o Matagaluega taitasi o le Malo o Samoa, aemaise o le aufaigaluega, aemaise o lau faatalofa Samoa o lo o faafofoga mai i atunuu mamao aemaise o si o tatou atunuu aua le paia o Tama ma Aiga o Aiga ma latou Tama, aemaise o le falafesiitai ia Tumua ma Pule, o Ituuu ma Alataua, Aiga i le Tai ma le Vaa o Fonoti.

Ou te faatalofa atu foi i o tatou uso i Sasae, Tutuila ma Manua, Sua ma Vaifanua Fofu ma Aitulagi, Saole ma le Launiunasa lua, aemaise Faleula o Tootoo. O paia na o Samoa aua faafofogaaga i lenei taeao.

Lau Afioga i le Fofoga Fetalai, malo le tauasa faatamalii, malo le taupati. Faafetai le faataugamate ma le taeao matagofie, o lea ua e Tagaloatusi ma e tautai pesepese aua le paepaega o le fua, i ni loi o le Maota o Samoa i sui usufono mamalu o le Palemene, aua le tautiaga a le aupuputoa. Aua ne i galo le tualalo a le taliuta, aua ne i muliloa le vaai i le lauamanu, ae tapena le muliloa aua le faamulioatu.

E i ai le manatu ua i alo Vi o le tei o Tupua, i le atu faatautuli o le tautai o le mafua taualo taulafo i finagalo faaalua i sui usufono filifilia o le Palemene o Samoa na o latou foa le papa, ma tuulaupua le uluai tusi amata o lenei Paeaiga lona XVII, aua paia opoopogata i Tiafau. E le soa manuuli o le faautaga ae manusina lesua le tuleiga. Se malo faafetai, malo le tofa...

FOFOGA FETALAI: Ia ua ou vaelupeina le saunoaga a le sui usufono mamalu, ou te talitonu foi ua taulalata foi i le tatou faiga malologa. E talitonu foi o se avanoa lelei foi lea e toe fuatai ai le tai aua le aso a taeao. Ia ona o le tulaga foi ua taulalata foi ia le tatou malologa, ia o le ala lea ua ou faapai atu ai i le sui usufono mamalu, ia toe avanoa foi le aso a taeao pe a o tatou toe taliu mai ia tatou galuega, faaauau le saunoaga matagofie.

E talitonu e le itiiti se taimi sa tapena ma tau tuufaatasi ai, ae faamalo le silasila mamao ia Samoa ma lana tapuaiga. E le toe tau faailo, o se tasi lenei o galuega tutoa o Pulega Faatonu o le Tala o le Tupe. O lea ua saunoa le Afioga i le Minisita o Tupe e faamanino ma talatala atoatino Tala o le Tupe, faamalo faafetai.

E le i afea foi se faafetai a le Nofoa i le tapuaiga mamalu a Samoa le atunuu pele. I le afua mai ona ao seia oo i se aupito itiiti, faafetai tatalo faafetai tapuai. Ua ae ma le manuia faiva o lau Palemene i lenei aso, ona o le mana o la outou tatalo. O le a se gagana a lau Palemene ua le tautamalii, ia alofa ma faamagalalo.

Le paia e o le Palemene, o le a se upu a le Nofoa ua le tusa ma lau faafofoga, ia alofa ma faatafea i auapeau. E potu lava le tautai, ae le atoa atu i liu o lona vaa. O le tatalo ia tumau ana faamanuiaga i lenei Maota. Ia agalelei le Atua i le tapuaiga a Samoa, ae a le paia i Ofisa Sili o Pulega o Matagaluega ma Faalapotopotoga Tumaoti uma a le Malo ua tatou mafuta i lenei aso.

Ia, ae tatou te le i tolopo, ou te talosaga atu i le sui usufono mo le itumalo palota o Gagaemauga Nu 2 mo se tatalo e faaiu ai le tatou Fono.

Na tolopo Galuega a le Fono Aoaofa Faitulafono i le itula e 12:55 i le aoauli seia aulia le itula e 9:30 i le taeao o le Aso Lulu, 15 Setema 2021.